

嘉慶直隸太倉州志

直隸太倉州志卷二十七

人物

列傳二

太倉州

明

王錫爵字元馭嘉靖四十一年會試第一殿試第二授  
編修累遷至祭酒萬歷五年以詹事掌翰林院張居正  
奪情將廷杖吳中行趙用賢等錫爵邀同館十餘人詣  
居正求解居正不納錫爵獨造喪次切言之居正忽下  
拜引刀作刎頸狀曰爾殺我徑入不顧中行等既受杖  
錫爵持之大慟復祈郊外明年進禮部右侍郎居正甫

歸治喪九卿急請召還錫爵獨不署名旋乞省親去居  
正以錫爵形已短益銜之錫爵遂不出十二年冬卽家  
拜禮部尙書兼文淵閣大學士參機務還朝請禁諂諛  
抑奔競戒虛浮節侈靡闕橫議簡工作帝咸褒納時羣  
臣請建儲者衆帝皆不聽錫爵疏請勤御朝講日親大  
臣時披閱章疏而早定根本之計升儲出閣溫旨報聞  
十八年疏請豫教元子錄用言官姜應麟等且求宥故  
巡撫李材不報嘗因旱災自陳言臣備位六載朝講日  
踈災異日告南北寇敵生心而太倉錢穀枵然請餉請  
賑迄無以應至冊立大典久稽不行豫教急務亦且寢  
閣今京師亢旱風霾求召災故有妄傳宮廷舉動歸過

君父者主德未光由臣失職乞亟賜罷免帝優詔留之  
未幾偕同列爭冊立不得杜門乞歸且言聖諭謂安有  
子不順君父指私結人心以言激君父者夫元子年未  
十齡便疑防若爾自此漸壯羣臣愈當避私結之嫌永  
不敢再請於陛下指則順矣安所逃依阿悞國罪頃又  
喧傳中官有疾嫌疑之間甚有以小人曖昧之心窺測  
陛下者臣竊痛之疏留中不報尋以母老連乞歸省乃  
賜道里費遣官護行歸二年申時行許國及王家屏相  
繼去位有詔趣召錫爵二十一年正月還朝爲首輔先  
是有旨是年春舉冊立大典戒廷臣毋瀆陳廷臣鑒張  
有德事成默默及是錫爵密請帝決大計帝遣內侍以

手詔示錫爵欲待嫡子令元子與兩弟且並封爲王錫爵懼失上指立奉詔擬諭旨而又外慮公論因言漢明帝馬后唐明皇王后宋真宗劉后皆養諸妃子爲子請令皇后撫育元子則元子卽嫡子而生母不必崇位號以上歷皇貴妃亦擬諭以進同列趙志臯張位咸不與聞帝竟以前諭下禮官令卽具儀於是舉朝大譁給事中史孟麟禮部尙書羅萬化等羣詣錫爵第力爭廷臣諫者章日數上錫爵偕志臯位力請追還前詔帝不從已而諫者益多錫爵請下廷議不許請面對不報乃自劾三悞乞罷斥帝亦迫公議追寢前命命少俟二三年議行錫爵旋請速決且曰陛下去年之命旣改於今年

安知今年之命不改於他日曩元子初生業爲頒詔肆  
赦詔書稱祇承宗社明以皇太子待之矣今復何疑而  
不決哉不報七月彗星見有詔修省錫爵因請延見大  
臣又言彗星漸近紫微宜慎起居之節寬左右之刑寡  
嗜欲以防疾散積聚以廣恩踰月復言彗已入紫微非  
區區用入行政所能消弭惟建儲一事可以禳之蓋天  
王之象曰帝星大子之象曰前星今前星旣耀而不早  
定故致此災誠速行冊立天變自弭帝皆報聞仍持首  
春待期之說錫爵荅奏復力言之又連章懇請十一月  
皇太后生辰帝御門受賀畢獨召錫爵煖閣勞之曰卿  
扶母來京誠忠孝兩全錫爵叩頭對曰臣今日正恐忠

孝兩虧因力請早定國本帝曰中宮有出奈何對曰此說在十年前猶可今元子已十三尙何待況自古至今豈有子弟十三歲猶不讀書者帝頗感動錫爵因請頻召對保聖躬退復上疏力請且曰外廷以固寵陰謀歸之皇貴妃恐鄭氏舉族不得安惟陛下深省帝得疏心益動手詔諭卿每奏必及皇貴妃何也彼數勸朕朕以祖訓后妃不得與外事安敢輒從錫爵上言今與皇長子相形者惟皇貴妃子天下不疑皇貴妃而誰疑皇貴妃不引爲己責而誰責祖訓不與外事者不與外廷用人行政之事也若冊立乃陛下家事而皇三子又皇貴妃親子陛下得不與皇貴妃謀乎且皇貴妃久侍聖躬

至親且賢外廷紛紛莫不歸怨臣所不忍聞臣六十老  
人力捍天下之口歸功皇貴妃陛下尙以爲疑然則必  
如羣少年盛氣以攻皇貴妃而陛下反快於心乎疏入  
帝領之志臯位亦力請居數日遂有出閣之命而帝令  
廣市珠玉珍寶供出閣儀物計直三千餘萬戶部尙書  
楊俊民等以故事爭給事中王德完等又力諫帝遂手  
詔諭錫爵欲易期錫爵婉請乃不果易明年二月出閣  
禮成輔臣侍班及用詞臣六人侍講讀俱如東宮儀中  
外爲慰錫爵在閣時嘗請罷江南織造停江西陶器減  
雲南貢金出內帑賑河南饑帝皆無忤眷禮逾前後諸  
輔臣其救李沂力爭不宜用廷杖尤爲世所稱特以阿



並封指又郎中趙南星斥侍郎趙用賢放歸論救者咸遭遣謫衆指錫爵爲之雖連章自明且申救人卒莫能諒也錫爵遂引疾乞休帝不欲其去爲出內帑錢建醮祈愈錫爵力辭疏入上乃允先累加太子太保至是命改吏部尙書進建極殿賜道里費乘傳行人護歸比行以懲忿怒躬廟饗等十三事進規歸七年東宮建遣官賜勅存問賚銀幣羊酒三十五年廷推閣臣帝旣用于慎行葉向高李廷機還念錫爵特加少保遣官召之三辭不允時言官方厲鋒氣錫爵進密揭中有上於章奏一槩留中特鄙夷之如禽鳥之音等語言官聞之大憤論劾不已錫爵闔門養重竟辭不赴又三年卒于家年

七十七贈太保謚文肅

案張志云張居正歿擢擊者衆錫爵寓書當事言江陵相業亦

有可觀宜少護之以存國體戊子江南歲疫錫爵請蠲賦紕有司坍塌荒議民便之時國本未建太監張鶴蓄異意言官論劾幾得罪錫爵申救亡何鯨果賄敗庚寅元日上御毓德宮召輔臣入上手握皇長子令就視輔臣趨拜已命皇三子出輔臣擬拜如前土力止曰不可旋出維於仁疏欲寬罪目屬錫爵卿意云何錫爵進曰于仁誠有罪第竄以重典恐天下不知于仁誠上直爲陛下拒諫上意解同官因以冊立豫請上首肯詰朝上意忽變至疑羣臣離間錫爵疏言凡稱問者貴使賤之親使疏之今皇上引元子明示臣等長幼衆殊臣等勸冊立以成上所欲貴請緣教以成上所欲親何名爲間疏入弗省屢疏凡六上至援九廟兩宮且云皇上豈可差舉一念臣等豈可苟順一言上手諭倫序已定朕何敢私特以長子羸弱待十歲後大典並行錫爵因語人曰聖意無他第不欲發自臣下吾屬當靜聽之會礦議起上遣中涓問錫爵言開礦必聚徒聚徒必防亂官吏驛騷利一費百且示國貧匱大非筭遂中寢鄉居喜種花果嘗微服邨塢間有物色亟匿去居家寒素終身無妾媵晚蓄二婢卧起數歲嫁去猶處女云

弟鼎爵字家馭少依兄受經堅苦

自力讀書不五百過不易隆慶二年成進士授刑部主事調禮部移疾歸已補主客司郎中時錫爵爲禮部侍郎故事引嫌改南京吏部驗封司久之擢河南提學道會錫爵以抗張居正歸媚居正者欲拔鼎爵以詆錫爵鼎爵不自得竟歸杜門却掃當事罕見其面惟肆力古文辭所著哀然會丁艱服闋病卒從弟元爵字尊馭其父夢臣字良徵有隱德萬歷年間錫爵被存問命元爵賚奏入謝授中書科舍人擢侍經筵冊封慶藩充副使捧光宗登極詔所至餽遺悉絕尤熟水利議濬婁江諸幹河桑梓賴焉錫爵子衡字辰玉錫爵忤居正衡時年十三倚膝誦歸去來辭錫爵嘆曰不去乃爲寧馨笑遂

卽日歸錫爵後柄用萬歷十六年衡順天鄉試第一郎  
官高桂饒伸疏論不已上怒譴伸桂衡請錫爵疏救人  
更以此多之至二十九年錫爵歿乃會試成進士廷對  
第二人如其父授編修是歲奉使江南因請終養久之  
病瘍卒年四十九衡詩文俱名家尤長經世畧注意邊  
務論者多惜其未用子時敏字遜之未弱冠祖父相繼  
卽世以恩廕授尙寶丞奉使齊豫楚閩兩江及藩封者  
四天啟四年陞正卿丁內艱服闋遷太常寺少卿仍筦  
尙寶事又五年謝病歸當爲丞時刊神宗諭筆及文肅  
揭藁流布遠近東朝定策心事乃白又請建立專祠用  
揚祖烈家居飭內行著家訓勗諸子讀書砥行維持善

類獎掖英髦以其身係鄉黨重者四十年時敏性通達  
工詩文書畫畫師黃公望八分師魏受禪碑參用夏承  
碑法寸縑丈幅海內珍之卒年八十有九祀鄉賢祠子  
挺揆撰持抃扶摠掞抑持字平宰扶字匡令貢生餘自  
有傳

周鐸字子振嘉靖四十四年成進士授南京兵部武庫  
司主事歷遷員外郎郎中不受要津請托出爲嚴州知  
府爲政廉平中蜚語謫汾州府同知嚴州士民卧轅擁  
泣稍遷福州府同知汾州父老遮留如去嚴時閩中數  
被倭鐸繕餘艤簡驍銳預設戰守備倭不敢入詔賜金  
褒勞陞南京刑部山西司郎中又出爲漳州漳故邊海

民慄悍諸惡少嘯聚爲盜鐸擒治其魁四境肅然臺司  
以異等薦鐸竟移疾歸築數椽羅列圖史座右揭靜以  
修身儉以養德八字爲箴年八十二卒

案張采志載鐸爲善卿子及開

鐸墓志父號靜齋贈南京兵部郎中又邱某著善卿傳云子喪家亡貧無以葬其從子鐸守嚴州乃遷葬公於祖塋之昭穴則鐸非善卿子也舊志未知何本因爲訂正

郊鼎字薦和宋郊置後鼎生三歲而孤聰穎力學嘉靖  
四十四年進士觀工部政奉使東萊復命除知嘉定州  
改茶陵陞工部都水員外郎轉營繕郎中尋陞浙江右  
參議未期年罷歸闢樊春圃招故舊遊宴十餘載卒置  
有功三吳水利專祠已廢鼎請於當事復之世以子孫  
一人奉祠事

管志道字登之隆慶五年進士除南京兵部主事改刑部張居正秉政志道上疏條九事以譏切時政其中有憲綱一條則言兩司與巡方抗禮國初制也今之所行非是居正卽出之爲廣東僉事未幾御史龔懋賢又劾之降鹽課司提舉明年外計以老疾致仕志道好理學談易語多悠繆卒年七十三曾孫正傳崇禎四年進士歷知永豐贛縣著風節爲忌者所中以冤天死

沈昌期字元際其先山東滕縣人昌期幼奇穎長益嗜學同里王錫爵王世貞世懋爭致之萬歷十一年成進士授龍溪知縣申雪誣枉一縣稱神故事以贖鍰積穀多寡爲令殿最昌期奏記言令不能使訟繁致粟多御

史躔之邑田負山枕海被水衝齧多失額其漲者豪右率隱占之昌期下令清丈許自實不實有罰人不敢隱科其糧以抵失額又興水利墾曠土歲得穀千石於是葺學舍新鄉賢祠文教翕然熒獨矜寡收卹備至以治行尤異擢驗封司主事常例行取必抵都需次昌期卽由縣令實除稱異數歷遷稽勲員外考功文選郎中在部五年抑絕奔競人不敢干以私蘇州知府某以忤巡撫被劾昌期知其循吏亟白寃得改調政府爲幼子求兩淮運判昌期不可未幾推陞御史建言礦稅害謫大埔典史怡然就道旋歸里及卒家無餘貲熹宗元年錄礦稅註誤諸臣贈昌期太常少卿子綿應字麟系庠生



以薦授辰溪知縣辰爲滇黔門戶屬當軍興綿應練兵備禦寇不敢窺爲政有惠愛未期年有十六可美謚崇禎十六年卒於官貧甚鬻書以殮遠近聞之爲罷市

張輔之字爾贊萬歷十四年進士授行人十九年選工科給事中歷禮兵兩科晉兵科都給事時哱劉反西夏督臣頓兵不進輔之疏糾之復陳方畧數事倭酋破朝鮮樞臣議主款貢輔之論止之播酋楊應龍介黔楚蜀間擾害尤甚輔之請特設總督責成蕩平在兵垣前後四十餘疏凡歷三大征區畫事宜悉中機要御史曹學程忤旨擬辟時值廷審皆署情實輔之獨會疏救得末減歷陞太僕太常等卿晉工部右侍郎務節省足國用

察姦商破冒物料及胥吏濫用稍食弊竇一清天啟三年晉尙書四年魏璫用事連疏乞休得請歸里崇禎二年卒年八十三輔之有幹畧居鄉捐貲濬小塘鹽鐵諸河嘗值水災發粟平糶全活甚衆祀鄉賢祠

錢桓字握之萬歷七年進士授任邱知縣丁艱補藁城擢山東道御史巡視京城出按畿南再按四川入掌河南道陞太僕寺少卿以僉都御史巡撫南贛目胥乞休歸又數年卒桓長者中立無所黨歷有政實任邱地衝且雜中人豪貴治以清肅稱盜劫富民未獲富民執其讐以抵之桓疑非是釋所執購得真盜按畿南時邯鄲井陘間大俠恣橫桓置諸法三輔震栗四川惟酷歲約

四萬中人徵督爲厲桓同巡撫割贖緩代之民以不擾  
章貢水溢漂民廬舍桓急請賑報可苗民時狺突桓戒  
將吏守要害毋弛備毋貪細功諸蠻警服信豐令貪墨  
巡撫巡按庇之桓力劾去兩關稅萬計舊爲官吏乾沒  
桓檄關吏薄其權貯之府藏以備兵興旱潦性儉日鮭  
菜一盂居鄉清謹約束子姓至今頌其醇德長子炳以  
明經授富陽令次子華天啟辛酉副榜歷任英德仁化  
令經濟俱有父風孫增字真卿崇禎四年進士授行人  
奉勅封藩屏絕餽遺擢兵科給事中轉刑科都給事讜  
直敢言嘗劾楊嗣昌悞國狀年四十二乞終養歸國  
朝順治九年撫按交章薦以母老辭歿祀鄉賢祠

王在晉字明初蚤失父家貧受書于兄在恒母病痿身  
自抱持者累年萬歷二十年成進士授中書舍人轉工  
部營繕司主事改都水司督山陵工權杭州南關稅陞  
福建興泉道平海寇有功丁母憂服闋補湖廣荊南道  
水災括贖緩賑濟全活無筭改副使湖廣學道轉浙江  
杭嚴道勦平劇賊免民船僱運卓異遷江西左布政再  
舉卓異擢都察院副都御史巡撫山東籌劃海運接濟  
遼左陞工部侍郎總督河道卽授添設兵部左侍郎總  
理戶兵工三部遼民渡海聚登萊請金十萬并發山東  
所積穀賑之水西蘭酋反在晉舉朱燮元等征勦蜀遂  
平天啟二年 大兵取西平破廣寧特授兵部尙書

賜蟒玉尙方劍經畧遼薊天津登萊等處軍務代熊廷弼乃整理關務招徠諸部漸有功緒已召還爲南兵部尙書五年轉吏部崇禎初歷改刑兵兩部尙書致仕卒年八十崇祀鄉賢祠子會華字元升川學生蔭錦衣衛中所正千戶丁憂家居順治二年大兵下蘇州鄉老會於明倫堂爲納款計會華垂頭不荅歸七日不食餓死

黃元會字經甫幼孤感奮爲學與同郡姚希孟齊名萬歷四十一年進士授工部都水司主事管窰器厰光宗在儲位宮監傳諭索器皿折價元會抗言曰非所以光潛德也不與攝大木厰因殿工立註銷積高法中人不

能私徃督夏陽開工咸有次第省帑數千兩事竣擢南昌知府廉佐令之貪橫者黜之宗室驕恣一裁以法削其冒封二人省厨傳之擾庶死難武臣之子卓異入覲賜宴禮部如一品大臣儀稱異數陞按察司副使主驛傳視卒麗臯重輕定爲三等供役法尋轉提學副使益藩以清道撻士士譁王疏聞元會調護得薄罰會鄉試迫以百餘日畢十三郡試勞勩成疾轉山東布政司叅政按撫議留仍改江西按察使疾作乞歸卒年五十一元會喜黃老家言神識清遠不屑詭隨亦不屑皎皎異故終身不受牽於門戶焉

王遇賓字叔元父文澗有兄年老爲人所訟吏捕之急

文澗負兄代辯知州呵責甚厲文澗伏地請曰兄年老受刑必死某壯願代守義而釋之遇賓幼攻苦讀書受易於歸有光萬歷三十二年成進士授直隸青縣知縣邑大饑設糜施賑部署井然調河間邑有馬戶出貲養馬斃則買償當之者困遇賓請以公帑市而盡除其籍地多中貴莊宅一切裁以法奉檄往長蘆掣鹽吏以羨餘進揮去治五載巡按薦贖二十四上行取至京補大理寺正四遷至刑部郎中出知四川渝州府渝故饒名材採木使者輦金動百萬計悉由知府關給遇賓毫無所私白蓮妖衆屯結境內縛渠魁投之江支黨解散秩滿陞按察副使備兵川南四十六年蘭州安酋與黔地

奢酋共作亂臺檄遇賓單車往諭安酋受命引退復受檄勘傷黔蜀將吏受安酋賂多所隱匿遇賓據實以聞勘案遂定尋乞歸卒年七十有六祀鄉賢祠遇賓勘事畢適遼左軍興奢崇明子寅請率一旅自効遇賓力止之曰此酋包藏禍心令借勤王名奮袒疾呼全蜀危矣復調兵檄至奢酋捲甲趨渝遂叛人服其先見云

陸獻明字君謨萬歷三十五年進士除嘉興知縣以廉能第一入爲御史巡按貴州時水西酋安邦彥叛亂甫入境而撫臣王三善之師全軍覆沒隸卒皆號泣不前獻明申令曰敢有訛言阻衆者斬遂入城收積潰卒運餉設屯貴陽藉以無恐再按湖廣患水潦黃州市僧糾



衆遏羅獻明廉得其實立捕渠魁七人斃杖下江廣之粟大下時魏忠賢方熾楊漣瘐死詔獄復捏賊三萬行撫按嚴追獻明捐俸及全省贖鍰代完之又議紅丸案曰李可灼豈典醫之官紅丸豈對症之藥在可灼固有莫逃之罪而方從哲亦豈有心而後執其咎耶羣小益側目忠賢嘗使小閹餽以熟食不受強致於家獻明對使者擲物溝中忠賢益怒適黔事壞巡按傅宗龍丁艱忽內批復命獻明按黔加太僕少卿監軍務故事巡按無再差例忠賢謂獻明必辭辭則以規避罪之獻明聞命就道疏言欲破水西當用重兵三方並進後卒用其言復所失地安酋平轉正卿思宗登極上疏謂新政必

以勤學用人爲先又薦正人若文震孟陳子壯顧錫疇  
李繼貞等皆先後擢用使竣還京又上疏諫裁節驛站  
諸事皆切要尋以失儀被糾致仕與繼貞七日內相繼  
逐歸蓋溫體仁柄國也林居十年杜門不出卒祀鄉賢  
祠子日升崇禎十五年舉人

吳震元字長卿十歲能文十三補諸生萬歷四十年舉  
人天啟二年授灤州知州旋補德安通判時方追熊廷  
弼楊漣貲產震元謂朝廷重威福不重貨利力庇之且  
分俸周其家七年陞衡州府同知改漳州黃道周少所  
許可獨喜震元每與揚挖經史講說易象必達旦崇禎  
五年海賊劉香入犯檄震元守石美以計擒之六年春

紅賊亂震元守銅山督將士力戰大破之丁父艱歸不復出震元博通經史尤精識緯推知崇禎十年以後數當陽九歎曰只今便高卧已負半生間因作負半庵杜門著述周延儒強之出不應十五年病卒

李繼貞字徵尹萬歷四十一年進士除大名推官歷遷兵部職方主事天啟四年典試山東坐試錄刺魏忠賢削籍崇禎元年起武選員外郎進職方郎中時軍書旁午職方特增設郎中協理司事繼貞幹用精敏尙書熊明遇深倚之曰副將以下若推擇我畫諾而已孔有德反山東明遇主撫繼貞疏陳不可且請調關外兵入勦明遇不能從後詔用其言滅賊崇禎初延綏盜起繼貞

請如神廟特遣御史振濟故事齎二十萬石以往安輯  
饑民以孤賊勢帝遣御史吳牲以十萬金往繼貞少之  
帝不聽賊果日熾繼貞爲人強項在事清執請謁不得  
行大學士周延儒繼貞同年生屬總兵官於繼貞繼貞  
瞠目謝曰我不奉命必獲罪刑部獄甚寬可容繼貞也  
延儒銜之已加尙寶寺卿當遷帝輒令久任田貴妃父  
宏遇以坐門功求優叙不獲中官曹化淳欲用私人爲  
把總囑戎政尙書陸完學言於尙書張鳳翼以命繼貞  
繼貞亦不可化淳怒與宏遇日伺其隙譏之帝貶三秩  
會叙甘肅功繼貞請起用巡撫梅之煥帝遂發怒削繼  
貞籍已論四川桃紅壩功復官致仕十一年用薦起歷

兩京尙寶卿明年春召陳水利屯田甚悉遷順天府丞  
尋超拜兵部右侍郎兼右僉都御史巡撫天津督薊遼  
軍餉乃大興屯田列上經地招佃用水任人簿賦五議  
白塘葛妨數十里間田大熟餉司葉廷桂多侵卒繼貞  
繩以法廷桂結厥衛陰中之四十年冬坐發水師援遼  
戰艦不具除名帝念繼貞不置明年夏召爲兵部添注  
右侍郎得疾卒於途繼貞廉敏有才畧實心任事孤立  
獲主知未竟其用天下惜之贈右都御史官一子

徐憲卿字九亮萬歷四十一年進士授行人泰昌元年  
擢南京工科給事中掌計典尋管京營軍務時閹黨用  
事三案議起憲卿疏論李可灼侍疾不謹宜按祖宗法

死無赦天啟四年疏言駕帖之僉北司之拷非所以示天下公宜以罪犯付法司內外章奏還內閣職掌無使輔臣失職其言皆侵權璫已又特疏糾忠賢客氏及其所用要人姦黨側目時緹騎四出在籍者先後逮獄或說以媚璫解禍憲卿不爲動亡何忠賢死七年起添註南京光祿寺少卿陞太僕寺少卿駐滁州視江南北馬政土寇大至憲卿率民兵登陴寇不能攻以病致政歸甲申聞國變時時慟哭而卒年八十有二

許國榮字允尊二歲喪父家絕貧母朱氏育之天啟五年成進士授太常博士三年選工科給事中時太監掌版事邏卒訶刺中外目懾又張爇憲總督戶工兩部凌

部曹國榮上疏極論觸獎憲恨未幾外解鉛至國榮監收固中額中人報闕少激上怒褫職後七年事白起補應天府照磨量移光祿寺署丞病卒國榮在諫垣章數十上論復大寧救罪謫諸臣尤中事要事母至孝母性嚴少不如指卽詆誅國榮長跪請母色霽方起以爲常與人交有本末周恤親黨多待以舉火者

顧燕詒字安彥其先滁人燕詒弱冠爲名諸生以貢入成均崇禎元年成進士授刑部主事出守濟南蠲除苛細聽斷明決歷五載擢署本省糧道遷福建驛傳道以平賊功調嘉湖兵備時浙西爲盜藪燕詒至則完城郭蒐卒伍儲芻茭有保民四事書值嘉善漕卒變燕詒輕

騎往諭指顧懾服又倡築海塘保障二郡功甚鉅進本省按察使陞右布政使往例錢穀悉歸左使右惟主繕黃冊需索繁多燕詒治郡時燭其弊至是悉除之先是吳時來官文選司郎中倚周延儒勢張甚燕詒拒弗與通時來銜之誣劾燕詒奪職間住歲餘時來死東市燕詒得雪復官入國朝有欲薦燕詒者以疾辭知州白登明禮喪東七老燕詒居首平生性剛直於社局獨無所附宦途中目之爲東鄉強項人康熙六年卒年八十五有容菴仙畚諸集子景錫字介淑順治乙未進士授安慶府教授以心疾廢光復字宣遠康熙辛酉副榜工詩能文著有雪鴻集孫之翰字受其由廩生入貲爲平湖



主簿終彰德府通判平湖人稱爲小青天

張溥字天如伯父輔之南京工部尙書溥幼嗜學所讀書必手鈔鈔已朗誦一過卽焚之又鈔如是者六七始已右手握管處指掌成繭冬日手皸日沃湯數次後名讀書之齋曰七錄以此也與同里張采共學號婁東二張崇禎元年以選貢入都采方成進士兩人名徹都下已而采官臨川溥歸集郡中名士相與復古學名曰復社以繼東林四年成進士改庶吉士以葬親乞假歸讀書若經生日有常程每侍史繕錄口占手注六七輩不給四方人士翕然歸之以不及其門爲恥所品題甲乙頗能爲榮辱溫體仁惡之里人陸文聲者輸貲爲監生

求入社不許因詣闕言風俗之弊皆原於士子溥采爲主盟倡復社亂天下體仁下所司遷延久之皆言復社無可罪閩人周之夔嘗爲蘇州推官坐事罷去疑溥爲之聞文聲訐溥遂言溥等把持計典已罷職實其所爲因及復社恣橫狀章下巡撫張國維等國維言之夔去官無預溥事提學倪元珙亦言諸生誦服聖賢引徒講學實非黨俱有旨切責至十四年溥已卒而事猶未竟刑部侍郎蔡奕琛坐黨薛國觀繫獄未知溥卒也訐溥遥握朝柄已罪由溥因言采結黨亂政詔責回奏采上言復社非臣事然臣與溥生平相淬礪死避網羅負義圖全誼不出此念溥日夜解經論文矢心報稱曾未一

日服官懷忠入地卽今嚴旨之下并不得泣血自明良足哀悼當是時體仁已前罷而周延儒當國溥座主也故采疏上事卽得解明年御史劉熙祚給事中姜埰交章言溥砥行博聞所纂述經史有功聖學宜取備乙夜觀因薦采學行帝御講筵問及二人延儒曰讀書好秀才帝曰溥已卒采小臣言官何爲薦之延儒對曰二人好讀書能文章言官爲舉子時讀其文又以其用未竟故惜之耳帝領之遂有詔徵溥遺書有司先後錄上三千餘卷帝悉留覽溥性忠孝事母極婉順談朝廷事輒欲有所澄清與朋友周篤聞正人忠難如身受卒時年止四十無子立嗣門人私謚曰仁孝先生

遣戍去在保定境內殘破盜賊晝抄掠郡縣日選丁壯  
乘城克孝至盡撤之而密擒渠魁秦鳳吾等斬以徇抗  
疏言聞賊披猖方今所憂不獨關陝洛陽宜宿重兵趙  
魏以壯神京右臂當國惡其戇報罷克孝乃日爲補苴  
計峙糗糧繕城隍復險隘墾荒土萬餘頃易州礦使橫  
克孝咎其卒而直陳礦使諸不法當國罪以擅責禁校  
尙書鄭三俊救之得免在嘉湖募健勇練水師擒盜黃  
文魁姚二等斃之桀盜葉大集黨千餘刼官鞘郡縣莫  
如何又斗張三者驍勇過於葉俱捕以正法監軍太監  
高某擁潰師鈔暴克孝嚴兵待之某引遁克孝檣梧彌  
庠目眚益劇遂告歸嘉湖人遮道泣送至有赴水挽舟

而沒者三人 國朝初華亭陳子龍亡命吏疑克孝素  
與善匿之被逮未至而事解得免卒之日貨錢買棺以  
殮年八十一祀鄉賢祠

胡周鼐字其章崇禎十三年進士授刑科給事中立朝  
數月封章十餘上嬰權忌罷職明年復起以親老辭鼎  
革後會海警知州李作楹用其策城守邑中安堵有  
詔直省大吏起在籍搢紳周鼐丁內外艱卒辭不赴  
陳瑚字言夏朝典子少承家學通五經凡天官河渠兵  
農禮樂以及壬奇諸書無不貫串與陸世儀江士韶盛  
敬相剴切世所稱四先生者也崇禎十五年領鄉薦明  
年江南大饑上當事救荒四政支吾三策搯腕時政著

私議十條又著續議五條皆切要或勸上之曰此非借  
箸時也 鼎革後奉父避地崑山之蔚村躬耕以養村  
田沮洳瑚導鄉人築岸禦水歲獲豐穰又與陳說孝弟  
之義及爲善三約遠近向風遊其門者多俊偉之士冬  
月常衣單袂客有重裘者欲解以贈竟席不敢言退而  
語人曰吾乃知當世有陳無已也 國朝詔舉隱逸知  
州白登明將以其名上督撫瑚力辭乃已卒年六十三  
門人私謚曰安道先生巡撫湯斌卽其故居爲立安道  
書院又入祀鄉賢祠

陸世儀字道威天姿英邁弱冠志聖賢之學謂孔子之  
後有真儒周公以下無善治其學以居敬窮理爲本而

推極於體國經野凡天官地理禮樂河渠以至用兵行陣之法口區手畫燦若列眉窮居授徒隱然負開濟之重鼎革後絕意科舉體驗益精著述益富順治間督學張能鱗具禮聘委輯儒宗理要後常講學於錫山東林書院說易於毘陵大儒祠設教於雲陽黃塘聞風親炙者皆感動奮發卒年六十一門人私謚尊道先生亦曰文潛先生祀鄉賢

盛敬字聖傳家貧處之泊如名其所居曰寒溪書屋矢志存誠主敬之學鼎革後教授寒溪上以成就後學爲事平生篤於孝友居喪盡哀三年不飲酒食肉有弟遇之無禮敬終始怕怕年七十六卒遺訓凡浮屠妄誕

之說概勿用門人私謚曰貞介先生祀鄉賢祠

江士韶字虞九御史有源曾孫弱冠爲諸生與陸世儀陳瑚講程朱之學家本素封中落遊郡縣幕籍修脯以養律已四戒不循情面不通竿牘不職苞苴不通外內舞文所至敬信然往往與懷私者忤卽別歸坐是貧益甚父某年高士韶愉色婉容卽僅陳菽水其父未嘗不樂也父喪哀毀骨立母喪士韶適往湖南北歸號慟四十餘日無輟聲以遊橐葬兩親不問弟姪族叔某貸百金於友漫以士韶證後不能償士韶以已田償之同時理學諸儒多著述士韶以爲三代聖賢之旨盡於昔儒之論說惟在躬行而已晚年取平生所作聚而焚之故



不傳於後云

郁法字儀臣篤志好學問陸世儀與同志講程朱之學慨然慕之家有樓曰靜觀宏敞爽塏迎州學正雲南文祖堯講學其中邑中好修士會者常數十人時又有曹煒曹鈐錢墀夏有光之屬煒字暉吉從文祖堯熊開元論學有得性孝友與人交無町畦誘善規過人人以爲親已鈐字尊素幼失父母事庶母惟謹鄉黨稱孝與陳瑚陸世儀江士韶盛敬諸人遊誼甚篤嘗風雪中念士韶貧病呼舟攜錢往贈順治九年歲大饑民困徵輸鈐赴淮上陳分年帶徵之議臺使者如議奏淮困得甦劉河塞與顧士璉條浚之墀號勿齋桓孫與江士韶相磨

切所學亦精詣有光字玉汝以武舉爲閩部史可法標  
將揚州破退隱巴湖與陳瑚陸世儀等講學見淮雲問  
答法子植字東堂幼尙異書過目輒成誦入歲試五倫  
論吳偉業見而奇之未冠補諸生豪於詩古文詞與虞  
山錢陸燦稱雙璧植秉父教又嘗從陸世儀遊兼求性  
命之學 國朝薦博學鴻儒科未試卒植從弟禾字計  
登亦遂於經學

顧夢麀字麀士其母夢神人授以石麒麟而生故名崇  
禎六年副榜貢士入太學夢麀嫉文風潰決畔違傳註  
乃獨闡正義著四書說約海內翕然宗之稱織簾先生  
時薦辟令下巡撫張國維欲上其名於朝夢麀固辭

國朝初或冒其名走謁當路貴人遂被欵接委職至府通判夢磨聞之曰我自爲我彼焉能挽我哉竟不發其事人推爲長者子湄見文學傳

王育字子春家貧好學于書廨所不覽嘗元旦筮易得復之初九次年元旦復筮得之育曰天教我學顏氏之學也遂與陸世儀陳瑚盛敬諸人講學積力深思幾進於道性強毅人敬愛之居家損絕異端喪葬悉從古禮鼎革後角巾方袍與世泊如 國朝康熙間州舉鄉飲賓又 詔舉山林隱逸皆辭不應卒時年八十有八易簣前一日猶與友人講易如平時於五經皆有著述又嘗以六書之學失其傳乃推古聖賢造字之本根

於六義證以五經積五年成二十萬餘言旁通岐黃之

術其剖析多奇秘云

兩成志邑乘小志云國初邑中

士張永暉鑒繪以圖石隱王育作十老圖歌歌曰桴亭  
酒酣面微赭滿腹經綸未易為樊村虬須氣吐虹兀坐  
四海經營中高冠峩峩切雲峯存齋顏然玉山倒懷仁  
抱義不知老寒谿行止動合矩珊瑚一枝出海底纂述  
千古邇良史和氣翔洽在眉宇隨菴丰姿溫如玉得喪  
不足擾其腹口拈五字吟須元垂綸戴笠者鴻逸志樂  
山水無與匹子然遺世而獨立愚菴江子我門徒天懷  
孝友俗情疏齋明飢驅走京師歸來閉戶人望宇咸儀  
柳輒神清驪菊齋非僧服僧服舉羽祠前曾慟哭海嶽  
龍宮受直錄世人爭呼孫思邈確菴黝然有深憂忍卻  
饑寒爲道謀文章萬卷走九州莊  
溪八十老不死露頂倚杖看雲起

直隸太倉州志卷二十七終

直隸太倉州志

卷二十七 列傳

二十四

直隸太倉州志卷二十八

人物

列傳二

太倉州

國朝

吳偉業字駿公愈元孫父琨以經行稱鄉里偉業幼有異質篤好史漢張溥見而奇之因留受業於門崇禎四

年會試第一愍宗批其卷曰正大博雅足式詭靡

偉業時文

稿名式靡編蓋因此殿試第二授翰林院編修給假歸娶時有姦

民首告復社事當軸陰主之欲盡傾東南名士偉業疏論無少避九年充湖廣鄉試主考官因召對言冢臣職

司九品若所舉不當何以責之臺省輔臣任寄權衡若所用不賢何以責之卿寺帝深憊之冊封延澤孟津兩藩王陞南京國子監司業會黃道周論楊嗣昌奪情事受廷杖偉業具橐餗遣太學生涂仲吉入都訟寃旨嚴詰主使幾不免十三年晉中允諭德尋轉庶子未幾擢少詹事甫兩月謝歸 國朝順治間總督馬國柱薦授祕書院侍講陞國子祭酒丁嗣母憂旋以江南奏銷議處里居終身適遂初志焉所居梅村名鹿樵精舍本王士騏賁園花木翳然因取以自號十餘年卒年六十三遺命墓前立石題曰詩人吳偉業之墓其寄托如此爲文瑰偉宏富詩尤擅勝取明季遺事用王楊元白體詠

之曲折詳盡使人有黍離麥秀之感子暲字元則年十四補州庠生以拔貢生入太學康熙二十七年成進士由戶部主事遷兵科給事中四十四年青浦王原長洲王銓劾陳汝弼汝弼言原等實挾仇引暲爲証遂以事牽連落職旋白入直武英殿充書畫譜纂修官暲才藻擅一時自家人至奴隸咸通聲律時爲美談尋以丁母艱歸卒年四十六暲兩弟隣字中麗蚤卒暲字少融壽光縣知縣有政績俱以能詩稱

王御字聖乘敦正學憤流寇披猖深慕王守仁爲人思廓清世難與陸世儀王發祥諸人講求兵法天文地輿阨塞無不精究以選貢登崇禎九年鄉薦十二年會試

副榜 國朝順治十二年就選得宿松縣學教諭移六安州學正所至整葺學宮誨迪士子遷房山縣令以簡靜慈愛爲政革除規例不名一錢邑有盜殺人親率兵獲其魁告歸年已耄矣好學不衰世儀謂其超悟似陳白沙年九十三卒學者私諡敬一先生祀鄉賢祠

王發祥字登善父日新見隱逸傳發祥弱冠有文名明崇禎九年舉人 國朝順治十二年成進士除刑部廣西司主事轉員外時

上慎選學臣臨軒親試取發祥第一奉

命視學湖

北詳列規條董率士子尤以表揚忠孝貞節爲急各邑志乘皆經論定又刊全楚詩文一時人文興起巡按李



廷松首列薦剡十七年兼攝湖南學政時鄉試期近百  
日中試六郡甄拔得人以事牽連解任尋還原職赴都  
候補卒年五十三子曾武見文學傳吉武字憲尹慧悟  
夙成習聞其父與陸世儀陳瑚諸人論說學歸根柢康  
熙十一年舉于鄉十五年成進士除中書舍人分校北  
闈爲同事受過左遷國子博士九年遷工部主事陞員  
外尋以戶部郎中出守紹興爲政簡靜忤太吏意甫二  
歲中計典歸副都御史李濤以實學薦不出老屋數椽  
炊烟時斷宴如也詩名與唐吏部孫華埒四方稱婁東  
詩者必曰唐王卒年八十一子安國字集虛州諸生入  
涇東文會稱後勁嘗客遊四方吟咏益工

張王治字無近幼從兄溥學弱冠貢入太學順治四年成進士授桐廬知縣縣故無城郭編戶凋殘王治悉心招徠漸歸復業地當閩衝更調繹騷舟師過縣索挽夫不足兵將譁王治公服曳舟以從督師者動色戒無犯于是襁負者日益至戶口得充實上官交薦擢工科給事中遂疏論東南漕兌之害請設官收官兌法兼以五米五銀刊爲定例又請開濬三江及江南分置藩臬並見施行其他論列皆切時要一二年中疏七十餘上會江南通賊案起多所株連王治引例陳乞保全甚衆卒以峭直爲衆所忌削籍歸里居十八年卒

黃與堅字庭表幼從呂雲等學張溥見而才之以諸生

拔貢入成均 廷試第一順治十六年成進士授推官  
旋以奏銷註誤康熙十七年應博學鴻詞徵試授翰林  
編修擢贊善典貴州鄉試時睢州湯斌以禮部尙書掌  
詹事並有輔導 皇太子之命

上難其副大臣羣推與堅遂以原銜充講官既有忌斌  
者嫉廷臣交章劾與堅獨不署名以葬親乞歸與堅  
工詩以性情勝嘗輯太倉州志未及梓行居鄉稱厚德  
年八十三卒

王揆字藻如錫爵曾孫時敏第八子康熙九年進士改  
庶吉士授編修丁內外艱服除由左贊善補右充 日  
講起居注提學浙江校劉宗周全集刊之表章啟頑忠

節立六賢講院又以三江口黃尊素祠已廢修復之期  
滿歷講讀累陞內閣學士轉戶部侍郎充 經筵講官  
三十七年調吏部右侍郎轉左時吏道龐雜姦胥得上  
下其手揆悉心條列定爲章程銓政一清 命督河  
工省帑金六十六萬四十二年陞刑部尙書尋調工部  
轉兵部禮部在刑部時往例錄囚止錄清書口供漢司  
官不能通曉揆請兼錄漢稿著爲令又疏爭香山令張  
令憲死事之宜蔭絀御史陳惟孜散遣太學諸生之非  
體抑功加之冒濫禁考工之陋規皆總持綱紀務存大  
體及爲大學士益恪謹五十六年冬會有御史八人以  
建儲請

上下其疏并出揆五月間摺外廷始知揆已先之矣翌日閣臣擬票具奏

上諭王揆所奏具見惻誠亦言所當言爾等票擬殊不合揆等所奏著留閣中時揆以折本故留中者謂之折本不敢同諸閣臣進

上召同入將出獨留揆造膝密語移時人莫得聞六十年春復具疏力申前請同時請者又有御史十二人上疑出揆意乃嚴旨切責命揆子奕清代往西陲効力時揆未解閣務以待罪不視事明年春仍命入閣任遇如故

世宗卽位揆以衰病請告

溫旨留京備顧問越六

年卒年八十四乾隆初年奕清還京爲父請卹奉

旨王揆身居政府爲國本起見亦屬分所當言予祭葬  
揆好汲引善類不植私人屢主鄉會試事均稱得士立  
朝從容風議不爲崖異及臨大事風節凜然

孝惠皇太后之升祔揆闡衆議請躋於

孝康皇太后之上其合禮多類此卒後廿餘年其孫懷  
經營卜地始克舉葬子奕清奕鴻奕清字幼芬揆娶長  
洲宋文恪公女婚夕夢有緋箋署其臥闥曰詹事府掌  
詹事旣而生奕清康熙三十年成進士授庶吉士歷官  
詹事府詹事奕清文章翰墨濡染胚胎筮仕後屢興試  
視舉凡 朝廷編修校讐之役多與焉六十年春奉

命代父赴烏里雅素臺軍効力腰弓躍馬忼慨首塗  
北出萬里抵大營屯分駐地曰忒斯曰阿達拖羅海窮  
荒大漠風景慘裂奕清素羸善病居六年宴然安之雍  
正四年再 命在阿爾泰坐臺例應出貲贍蒙古人

等盡斥家產以給又十年乾隆元年始 召還都仍以  
詹事管少詹事奕清更事久益練達條奏三上切中時  
弊明年春請父卹典給假營葬不及就道疾卒年七十  
三位終詹事竟與夢符奕鴻字樹先康熙四十八年進  
士授戶部主事歷陞員外郎中典四川鄉試有公明稱  
出爲湖南驛鹽糧儲道革除陋例諸務肅清兄奕清先  
有代父前往北路之 命奕鴻斥其產捐軍需銀五

萬兩請送軍前奉

旨詣烏里雅素臺効力臺在蒙

古外喀爾喀地與俄羅斯壤接蓋盟長超勇親王建牙之所也乾隆元年

恩命還朝發四川以道用初攝

松茂道適小金川土司相仇殺奕鴻奉檄前往曉以禍福各帖服尋補川東巡道引疾歸又十五年卒十家年八十二奕鴻質樸有至性在軍臺時聞父訃慟絕不能言者七日平生寡嗜欲履亨歷險不改其度人以此重之

王原祁字茂京時敏孫揆子原祁工詩文尤精畫法臻神品康熙九年成進士觀政吏部三十年充順天鄉試同考官稱得士除任縣令任故古大陸爲九河下流時



大遼部使者按視原祁力請弛賦又請於臺使奏減歲賦三千餘兩在任四年尙書魏象樞巡察畿南凡大案必委鞠焉尋行取擢刑科給事中轉禮科三十九年

特旨改中允入侍南書房歷侍講侍讀學士充日

講官累陞詹事府詹事掌院學士原祁以文章翰墨結主知常召入便殿從容奏對時或御前染翰日見親近五十一年陞戶部左侍郎會豫省災折徵漕米原祁力請分年買補又

上諭直省錢糧三年輪蠲一周舊欠並與豁免江南以奏銷稍後不入蠲數原祁獨請如詔旨不以桑梓

引嫌聞者遽之五十四年以疾卒於位特賜全葬

予祭原祁遇物坦易

上嘗稱其存心莫及沒後丹青流布寸縑尺素寶若拱壁自是江浙之工山水者皆本原祁而子孫以畫知名者亦衆子暮字孝徵康熙四十五年進士改清書庶吉士四十八年授館職五十四年充河南鄉試主考官丁外艱服闋入都五十九年冬提督陝西學政雍正二年陞洗馬五年回京充會試同考官又充日講起居注官陞右庶子旋擢侍講學士陞少詹事九月署廣東布政使七年春調直隸布政使時州縣新舊交代惟倉穀爲難或前官預儲醜穀或後官延宕不收暮稔其弊使碾米交代以一米抵兩穀糴之貯價于庫秋成時新任

買補有司便焉兵餉舊例于次月初始領前月糧暮令于前月望後卽發次月糧營弁頌爲善政十三年夏調任山西布政使乾隆二年入覲擢任廣東巡撫時瓊州一郡編征稅銀多缺額地方拘于考成在地丁榔柯稅排門烟戶等項均攤賠派暮徹底查清奏免四千餘兩以蘇民困又以郡懸海外水土瘴毒落茲土者遇有死亡道路遠家口不能歸骸骨旅殯暮請酌動存公銀兩給發路費著爲令南海神廟載在祀典向惟有司官代往暮必親往祀之五年冬有忌而劾之者奉旨回京至七年冬落職

命赴軍臺効力至第五臺

恩旨召還明年歸里十六年

南巡加三品職銜又

三歲卒子述溶字雋驥雍正四年舉人和州州同有惠政會歲饑奉檄查賑勞勩致疾卒于賑所孫鳳儀字廷和乾隆十二年舉人十七年教習期滿揀發湖北補宜城知縣調漢陽二十七年充鄉試同考官緣事被議引見復職旋丁外艱服闋發四川補犍爲由合州知州永敘廳同知陞成都知府擢松茂兵備道又以内艱服闋再補松茂調任永寧繼調陝西鹽法道以疾乞歸卒年七十鳳儀幹濟夙優所至有循績在四川時值官兵進勦大小金川羽檄旁午總督文綬留之幕府章奏俱出其手及在府道任內勘水災疏洩有法懲奸民鞠實定擬故松茂番民有佛子重來之頌鳳儀工詩畫能承其

家法鳳超字宗美事母孝兄官蜀奉母入川遇灘險遂  
得心悸疾逾月而卒其弟耘字涵青性嗜書官諸暨丞  
請修堤堰以禦水災蒞任三年卒

錢晉錫字方來以選貢入成均考教習第一謁選得富  
陽令時閩逆初平滿漢兵道富陽者船夫供頓調治得  
宜民不知擾復請蠲正賦興水利除磽瘠省差恤民善  
政悉舉以薦擢禮科給事中疏兩廣鼓鑄之弊及浙省  
造船之累論止鹽筴增引悉見施行陞通政使叅議轉  
督捕理事官痛抑投旗陷主之僕歷右通政遷太僕寺  
卿尋爲順天府尹裁抑豪蠹畿甸肅清立金魚池義學  
上爲親書廣育羣才匾額復疏請廣順天解額會山左

正統丁未少宗正 卷三  
饑流民走集京師晉錫煮糜日食數千人醫藥殮埋無  
算又設舟車津遣之費自冬徂春日與饑民接感疾卒  
於官晉錫性行慈和家居孝友諸生時嘗受里人侮既  
貴終身不校人稱長者

錢三錫字宸安康熙十五年進士授羅池令邑多姦民  
潛結洞獠爲害三錫以計擒巨魁戮之遂讐服終其任  
無譁卸者繕學舍集士子親爲講授人始知學二十四  
年充同考以治行擢江西道監察御史巡視東西城掌  
江南浙江道事皆稱職累陞太常寺少卿主粵東鄉試  
歷大理寺左右卿明法不阿多所平反陟光祿及太常  
卿宗人府府丞晉都察院左副都御史旋陞戶部右侍

郎轉左嚴核積弊姦吏患之構繫連染會將對簿三錫  
慨然引大臣不辱之義遂自縊事亦尋解

王初字天遊幼工詩文兼精勾股以太學生充算法館  
修書與父旦復同中康熙五十三年順天舉人館書成  
議敘授刑部主事巡視船廠陞員外郎擢貴州道御史  
巡察保定真定河間三府外艱服闋補浙江道巡視西  
城旋掌京畿道查河南賑晉工科巡視南漕再巡西城  
兼查萬安倉轉刑科給事中 命按山西報滿留任

以失察墩臺廢址謫監大西倉大通橋運再補工部員  
外充律呂正義纂修官轉郎中提督窑廠管理街道事  
授臨江府知府未任移疾歸旋卒初通達治體多建白

在廠一年工作以時匠役不能舞弊嘗條對十事爲軍民永久利多如請行巡西城時錢價昂甚請發戶工二部錢以平市價

上稱爲好御史在刑科論直省刑具率踰部式奏請畫一得 旨允行巡晉省入境知驛丞喂養馬匹累民奏請悉歸州縣問民疾苦體恤吏隱有聲臺垣中子學璧字繹古監生考取吏目由束鹿主簿陞故城令終河間府通判稱練習吏事

顧陳垆字玉停父宏沛有文名陳垆中康熙五十四年舉人以薦入湛凝齋纂修書成議敘授行人司行人出使山東浙江監督通州倉所至得大體雍正三年以員



疾乞歸陳塋有絕學三字學算學樂律俱精詣敦內行  
居喪不飲酒食肉不處內學宗陸九淵自命爲象山後  
身鋒稜謬謬纂修時總裁以文屬點定一日盡駁其稿  
總裁怒擲地陳塋徐起拾之明日總裁悟卒從陳塋說  
監倉洗手從事官吏經紀不得恣侵牟里居非公不至  
官府留心著述質疑問難者恒滿座乾隆元年詔起原  
官以親老不出時 詔舉博學鴻詞詹事王奕清薦之  
巡撫顧琮亦將論薦而時議巡撫偕總督學政宜先考  
試遂不赴時論高之年七十卒子文龍字元在乾隆十  
五年舉人詩古文詞並有家法常主廬陽書院未仕卒  
沈起元字子大父受宏見文學傳起元年十二能詩古

文詞康熙六十年成進士改庶吉士力求乞養歸旋丁外艱服闋雍正初澄汰部屬選庶吉士補之遂授吏部驗封司員外郎兼考功司事出爲福建知府初試福州隨授興化署臺灣所至除積弊革陋規捕宿盜懲訟師設立正音書院在閩三載政聲日上以平反定案忤按察使意被劾鐫級乾隆元年起授江西鹽驛道旋擢河南按察使晉直隸布政使內遷光祿寺卿十三年因公降級明年乞假歸起元性端慤遇事一本至誠而才識足以行之莆田縣有陳王二姓訐訟累年樹黨互毆巡撫按察使將各置重典起元廉其實獨坐首事者臺灣山猪毛社生番擾境衆議立界起元謂彼非內地特相

猛獸出山則噬人耳界何益請於山口設寨禁其出境  
遂寧中州潦歲饑起元議於本省不成災處招集授糧  
民以得生八年直隸旱總督議十一月開賑起元力爭  
得速賑所屬有妄稟賑戶不賑口者嚴斥之災民俱得  
實惠又若絕鹽綱之例餽却藩庫併封之餘羨省州縣  
解項之苛馭寬盜案三月之率結整葺書院以造士刻  
彰善錄以化民事不勝舉自少覃心理學謂學問須知  
行合一從五倫上做起時張伯行主朱子而斥陸王李  
絳主陸王而詆朱子起元不肯稍有附會又謂孔門弟  
子自顏曾外入門各異歸於聞道今但守定經書實實  
做人不必高言作聖晚益窮易理得其微奧撰周易孔

義以十翼爲宗歷主鍾山濠源安定婁東四書院歸里  
後藉館資自給宴如也詩宗唐音文學南豐書法李北  
海顏魯公晚益蒼勁縣舉鄉飲大賓至秋病謂醫曰吾  
自念平生學力惟檢點身心使明淨純潔以還天地父  
母耳言訖而逝卒年七十九子祖望字聰彞歷官江都  
縣丞以練達稱生平無疾言遽色工楷書

鍾洋縣

國朝

王宸字輯青乾隆七年進士授兵部職方司主事陞武  
選司員外充會典館纂修官十四年陞郎中秩滿記  
名以繁缺道府用明年秋充雲南學政十七年冬調任

四川振拔孤寒士風爲之興起任滿入都特授安徽廬  
川知府廬州爲包拯舊治宸抵任卽以拯清心爲治本  
之句顏於堂以自警政務簡靜慈祥而於奸猾不少貸  
如重懲米行之加用而市米頓充盡獲廬壽接界之克  
徒而民風趨善禁廬江縣民之私墾湖田以防壅水無  
爲州民之私挖礮山以防聚奸均於民生有實政三十  
二年引疾歸宦橐蕭然人以清介稱之知州貴中孚以  
州志請修屬稿稍就會中孚離任去事遂寢家后二十  
年卒年八十三

汪廷璵字衡玉其先世由新安徙太倉初名璿學政張  
廷璐爲易今名乾隆六年舉於鄉十二年試 咸安宮

教習

欽定第一明年中會試殿試讀卷名次第五

上親擢第三及第授翰林院編修充

會典續文獻通

考兩館纂修十五年充河南鄉試正考官明年

御

試散館一等又明年春充湖南正考官復

命甫踰

月

御試翰林詹事府各官題爲納涼賦同館皆鋪

陳宮殿苑囿規橰上林子虛之作廷璵獨以宵旰雨暘

憂勤民事立言

上嘉其用意正大擢一等一名超授侍講學士充日

講起居注官八月分校禮闈十月副武會試總裁十八

年充福建正考官試竣請假省親

尋奉

命督福

建學政待士子寬嚴互濟稽核周密二十一年丁憂回

籍二十四年再膺視學福建之命尋補侍讀學士是年  
功令增用試帖閩士狃於土音類多聲病莊璵為講求  
首釋一時生童多能詩者二十七年冬任滿還朝明年  
御試翰詹列二等一名 特賜文綺二端尋擢少詹事  
又明年入直尙書房侍 皇六子講席是冬 賜貂裘  
一襲自此供直 內廷居澄懷 賜園歲與 重華宮  
茶宴賡和奎藻 賜資便蕃不可勝紀三十年充湖北  
正考官明年遷詹事又明年遷內閣學士兼禮部侍郎  
三十三年奉 命督學江西三十六年還 朝明年  
副會試總裁復選中書學正榜所甄拔多績學者三十  
九年教習庶吉士四十一年以金川平定奉 命之

山東江南浙江祭告嶽瀆陵寢禮成請假歸省持節過里門爲母祝八十壽族黨榮之四十二年充江西正考官續奉督學順天之命三輔密邇輦下封印後

入都預朝賀承

召對暇日仍內直四十四年擢工

部右侍郎留學政任其冬丁內艱戴星南奔喪葬盡禮四十六年子學金成進士甲第與父同婁東四百年來惟王錫爵子衡兩世皆以第二人登第後先輝映人稱盛事廷璵寓書其子惟以敦品飭行無忝科名爲勗明年服闋入都仍署工部左侍郎兼內直充四庫全書總閱又明年奉命如盛京恭齋冊寶將啟行忽以無疾卒時年六十有六生平風度凝重簡默寡言笑持



已謙治家儉自登上第躋卿貳皆由

聖明親擢服官垂四十年久趨禁近小心慎密退則校勘圖史無異爲諸生時爲文務抉根柢每經進有作上輒稱善主文衡無虛歲著賜書堂詩文集及館課奏疏藏於家

畢沅字纘衡先世由休寧遷鎮洋乾隆十九年順天鄉試中式又三年補授內閣中書在軍機處行走二十五年成進士以第一人及第授修撰三十年陞翰林院侍讀充日講起居注官教習庶吉士明年充會試同考官尋轉左春坊左庶子授甘肅鞏秦階道三十五年從總督明山查屯田出嘉峪關自木壘河至吉木薩往返

數萬里著勞績總督以聞調安肅道明年擢陝西按察使入 覲具奏甘肅苦旱情形有 旨諭督臣加

意賑恤並豁免通省積欠四百萬兩十月擢陝西布政使十二月護理巡撫印務時方征大小金川京營及各省兵先後入蜀率取道關棧沅接運糧餉雇備夫騾撥解軍火器械安設臺站凡五年而金川平民間一無紛擾三十八年河洛渭三水並漲淹朝邑二十七村災民二萬六千餘人分別賑恤所全活甚衆十二月實授陝西巡撫三十九年春旱禱於太白山神取水靈湫雨立應得 旨加封昭靈普潤太白山神四十年三月兼署西安將軍清出八旗馬厰空地與平糶匡扶風武

功四縣境者四百八十餘頃令民開墾歲納租賦爲八  
旗賞卹之需請重修華嶽廟暨濬涇陽龍洞渠灌漑民  
田時西安提督移駐固原因募民墾各營廠地一百七  
十頃以歸實用是年陝西鄉試請照雲貴之例凡嘉峪  
關外鎮西迪化等屬不論鄉會試每人給與驛馬元聖  
周公墓在咸陽畢原有姬姓奉祀請援曲阜東野氏之  
例添設五經博士并奉文武成康四王陵祀俱報可四  
十四年十一月丁憂明年十月起署陝西巡撫四十六  
年甘肅河州番回戡蘭州郡守副將沅屬提督馬彪與  
西安將軍伍彌泰等領兵馳勦旣聞陷河州逼蘭州又  
檄延綏興漢二鎮一由固原平涼一由略陽鞏秦分道

並入旋值

上命大學士英勇公阿桂率八旗兵來軍總統事平七月河水復溢朝邑被災較重分別撫卹民以更生奏請修陝西省城工程宏壯三年而功始蒧四十八年正月奉旨實授巡撫四十九年四月平涼鹽茶廳番回亂奪西安州由靖遠渡河破通渭掠靜寧隆德莊浪沅先調兵赴勦

上又命阿桂率尚書男福康安統兵進勦不數月而事竣五十年正月赴京  陸見調河南巡撫時豫省連年大旱濱河郡縣復被水沅抵任卽請截漕二十萬石以濟民食諸縣未完錢穀請  旨全免外開歸等屬

四十八州縣緩至秋後開征其淇汲新鄉等十四屬請再展賑兩月

上降旨褒嘉且書

御製登澄霽閣詩于扇以

賜之十月奉

命赴桐栢山尋淮源具圖以奏蒙

賜

御製淮源記沅以豫省連歲洊饑民間田產往

往減價求售甚有以種麥將熟之地準賣者其價不及十之二三山西富戶聞風多所侵占因奏陳自四十九年後出賣之田產如價值過賤許原主陳明地方官備價取贖以三年爲限至近日連麥準賣之地限半月內呈明聽原主收割除歸原價外按照二分典息加償若賣主收割在先核記所收麥價除償本利其餘同地退

還俾豪強無能兼并而窮民不終失業奉

旨此奏

實可嘉已明降

旨照所請行矣五十二年六月河

洛沁水俱漲睢州下汛十三堡潰決沅親往搶護

上亦命阿桂臨工十月工竣其睢州六屬被水者請賑  
蠲免明年河北春旱麥收薄撥運麥穀十萬石減價平  
糶又將常漕各倉不拘常例糶借兼行並濬衛源之百  
泉懷慶之丹河九道堰及附近太行山向有泉源者俾  
民以工代賑並收灌溉之利又請將臨河新灘有地無  
收之糧銀改于通省攤完藉紓民力旋皆奉 旨寬  
免時湖北江漲決荊州堤潰府城工甚鉅  
上擢授湖廣總督兼署湖北巡撫乃同阿桂等相度剗

密金洲以疏淤泥蘆荻之遏水者復于對岸楊林洲接築雞嘴石埧逼溜南趨請修府城並文武衙署八旗駐防兵房其郡城內外被水災民屋舍器具漂失十九按戶散賑給銀修葺其荊州外二十九州縣同被水者分道撫卹湖廣積年吏治廢弛訟案累數年未結沅嚴督所屬兩歲中凡審結大小一千五百餘案訟獄以清五十九年二月迎 蹕天津召見于紫泉行宮以年多病乞補京秩未允會陝西之安康四川之大寧邪教案起皆稱傳教係湖北人牽引甚衆因除山東巡撫是秋河南衛沁二河水溢淹及本省之臨清德州館陶夏津武城冠恩邱各縣沅遍歷災區遵 旨倍賑並請

將本年漕米與應納秋糧一體捐免遴員分赴沿河豐收處糴買糧食存貯附近災屬以備來春麥前平糴之用明年正月仍授湖廣總督將去任飭查通省正耗民欠四百八十七萬餘兩常社米穀五十萬四千二百石悉奏除二月貴州銅仁苗民石柳鄧湖南永綏苗民石三保聚衆劫掠沅聞馳抵常德奉 旨令駐荆常適

中之地籌辦軍火糧餉是時官兵並駐鎮筸而永乾二州鳳凰廳之地盡爲賊藪徵發旣多轉饋益急沅令辰州之長岳常澧及荊州近水州縣先以常社存穀刻期碾運由辰州解赴軍營又令雇船裝載從朗江以達五溪較用夫背負爲省便至辰谿崖門砦以上多苗寨派



文武駐兵防護驛路運道始爲周密苗逃竄聚山谷利  
在火攻多購硝磺備用辰州以上逃徙客商酌給口食  
安置隣近苗寨州縣諭令團練鄉勇合力堵防而湖北  
之鶴峯來鳳宣恩隘口添兵駐守兼爲後路聲援撫卹  
難民擇其丁壯給糧以資派用苗有被脅者令自首先  
効順者事平後許給逆苗田產且先給銀布米糧以散  
其黨嗣永綏圍解而乾州永順各處苗民五百餘寨先  
後乞降逆首吳半生吳八月石老四以次就擒乾州亦  
定而是月湖北枝江賊起詭稱白蓮教宜都長陽長樂  
各聚數千人爲應沅赴枝江與巡撫惠齡進勦宜昌之  
宋家嘴對馬山別有賊數千分擾遠安東湖當陽則調

河南南陽陝西興漢二鎮往援兵未至當陽陷隨帥兵  
兼募鄉勇由河溶徑趨蘇家河直薄城下合圍破之時  
荆宜襄鄖施五府亂民四起沅密奏謂乾州旣復首逆  
就擒惟石柳鄧未獲不若乘其窮蹙予以自新而于苗  
疆四面安兵防守扼其要隘湖南額設兵外酌量增添  
約留兵二三萬足敷分布苗有出外滋事及同類仇殺  
者用前人鵬勦之法卽于就近降苗內以苗攻苗可不  
再煩兵力酌撤官兵以爲併勦湖北亂民之用奏入  
命下其章於軍中議之將軍明亮等咸以爲是嘉慶二  
年奉 旨馳往湖南籌議苗疆善後及撤兵事宜留  
駐辰州所奏悉從尋以積勞致病八月歿于辰州年六

十八贈太子太保祭葬如例後以所任屬吏侵蝕軍需連累革子孫世廕查封家產旋奉 特恩給還田屋

沅愛才下士四方歸之所最厚如洪亮吉孫星衍皆以才學取上第餘亦多知名之士自少好學未常釋卷獲古書善本輒校而付之梓常撰陝西中州山東金石記又以薛氏應旂所續資治通鑑頗舛陋裒集宋元人著撰考其異同補所未備成二百五十卷著靈巖山人詩三十六卷門人嘉興王復刻於偃師又仿朱彞尊經籍考作史籍考未成其同年浙江布政使謝啟昆校而續成之

嘉定縣

〔宋〕

孫載字積中曾祖漢英仕吳越爲崑山鎮防遏使父偁入宋終通議大夫叔父繼泉州節推嶽當塗令載治平三年進士除河中府戶曹更三守皆立威嚴載獨侃侃與爭曲直有中書檢正官察訪關中辟爲屬檄使按乾祐令不奉行青苗法者載言邑小民貧令實無罪弗果按選知德清聞誘是非出於誠信訟有累年不決者得一言感悟舍去熙寧中浙西饑縣獨熟載勸大家倍糴得十五萬斛明年米價翔踊使平直以糶全活甚衆移知考城諜告盜集境上將以元夕掠近郭載不爲動張燈設宴如常盜叵測遁去神宗嘗書載姓名付中書會

有沮者不大用歷冀東河北河東淮西使者知海沂婺  
州所至有惠政徽宗朝知亳州因常薦元祐黨人罷官  
提舉洞霄宮後以朝議大夫致仕卒載天資樂易好汲  
引士類受薦者至四百餘人後多知名少喜讀易著釋  
解五十卷弟臨大理評事臨五子實寘騫察宙皆仕而  
察尤以忠節顯靖康中察官朝散郎奉使金問徽欽二  
宗起居守節不屈金人裹以油絮焚之罵不絕口而死  
楊應龍字汝濟曾祖敏求宋徽宗朝官朝散大夫嘗上  
書諫元祐皇后不當廢忤蔡京罷歸隱居外岡應龍有  
文武才爲戚里婿孝宗在東宮親愛之寧宗朝官武功  
大夫兩浙西路兵馬鈐轄丐祠遂主管建寧府冲佑觀

王袞王由皆以將帥薦未用而卒子光輔承節郎孫滋  
爲兩浙安撫使以邊功歿理宗朝敕贈護國忠惠侯廟  
食里中

〔明〕

彭育字孝常以善楷書入國子監永樂十年成進士爲  
御史執法不阿時鈔禁甚嚴命育廉察獲實以聞按邊  
將匿塞外貢馬者寘諸法數平反疑獄宣宗朝賜緋衣  
嘗以事被誣下法司訊治無驗宣宗笑曰朕知小彭御  
史不愛錢那有此耶出爲福建叅政行法嚴峻爲部民  
所誣落職歸年踰九十以覃恩賜冠帶終於家  
徐瑄字子敬舉正統三年鄉試第一十年成進士爲監

察御史巡視京畿出按四川廣東所至有聲天順間廷議邊方要鎮不宜獨仗武臣推擇壯猷重望者往鎮撫之內閣李賢尙書王翱馬昂推擇六人瑄從御史起擢右僉都御史巡撫延綏爲戰守備甚豫寇擾邊瑄督兵戰於孛羅溝又戰於半坡墩金雞峪雙海子皆捷事聞賜璽書賞幣獎勞未幾丁內艱歸詔奪情起復不得已之鎮連疏以疾乞休年始踰艾而已及卒諭祭於家子昇字以質成化五年進士由工部主事遷南刑部郎中諫獄平允出爲湖廣叅議專務與民休息嘗督餉至邊剷除姦蠹軍民便之以課最攝左布政使入覲人以爲方向用竟上疏致仕蓋父子皆著勇退之節云五世孫

允祿續先允祿見文學傳續先字孟新崇禎十二年副榜知天河縣境多猺獍盜且蠶起續先綏蠻靖寇經書有方地在邊僻歲賦不均續先請於上官著爲定則民繪像祀之遷知趙州全家遇兵死

陸愉字以和天順三年歲貢生

寧晉志作舉人誤

成化五年知

寧晉縣事循用古道修舉廢墜善於化導鼓篋者無惰業辟田野招流移寬恤租稅民多全活河久淤塞乃疏

淪其汙潦引水灌漑至今爲利沒祀寧晉名宦祠

嘉定志云

寧晉縣志載陸事頗詳考藝志有葉盛送陸愉尹寧晉詩詩題下有傳然不及官績而楊韓二志并詩而遺之寧晉志修自前明且祀名宦祠則其居官實有功德及民可知因爲立傳以補前志之未備

葛鏞字文振成化十七年進士爲南京大理評事明於



獄嘗鞠盜疑其冤白寺卿釋之已而果獲真盜丐者  
薛李二人迫淫良人婦婦自經里人王亮擊殺丐吏逃  
亮抵罪臺部已允鑄駁曰薛李死當其辜亮爲匹婦復  
仇可原也竟得旨論免他所辨雪多此類官終寺正子  
昂字廷遠以字行博學砥行嘉靖元年舉人未仕卒  
李宗祐字吉甫其先福建旣寧人祖惠司教嘉定遂家  
焉宗祐登成化二十年進士官南京車駕主事歷員外  
郎郎中嘗督造馬快船盡祛夙弊編管富戶絕不容私  
勒石水西門著爲令性好客俸入恆不給官久益貧後  
卒於官

楊錦字尙綱成化二十三年進士官刑部郎中屢辨疑

獄擢江西按察副使適寇起章貢株連平民鞠釋者甚衆晉廣東按察使卒錦歷任刑官宅心平恕獄無冤者楊瑛字潤卿成化二十三年進士宏治初爲兵科給事中進掌科上疏請革弊政以保初治彈劾無所避嘗夜出遇太監某爭道批其頰某泣訴御前孝宗曰知是長楊故須避之久之遷太僕少卿與同官持奏不協出爲常德知府卒

沈焯字文明孝子輔之孫宏治十五年進士授行人正德初擢刑科時劉瑾擅政欲誣漳關守將姚諫重辟焯奉詔往與御史杜宏及知府郭任會勘二人畏瑾未敢決焯乃手攬獄詞拍案起曰吾終不能殺人以媚人明

日宏悟呼酒酹地曰願從公死獄上瑾大怒趣縛諫詣  
闕殺之下炤於獄杖幾死謫福建照磨未行丁外艱復  
逮至京謫戍寧夏瑾誅起桐廬主簿歷新昌令郴州知  
州終廣東僉事從弟灼字文燦正德三年進士授行人  
擢監察御史清軍浙江巡按福建江西皆著風裁宸濠  
圖不軌灼上疏首發其奸嘉靖初疏陳四漸一經筵輟  
講二詰責言官三數逮有司四偏信內侍且曰朝廷刑  
獄內付刑部都察院外付巡按按察司錦衣官校不宜  
輕遣指陳切直世宗至爲動容以議興獻大禮不合與  
同臺句容曹銓崑山方鳳同日乞休郡守胡纘宗鐫三  
高士姓名於虎邱石壁族子陽見治行傳

高鏊字企之少依舅徐氏因冒其姓徐本隸太醫院傳其業補醫士正德之季武宗將南巡修撰舒芬等合諸曹郎疏諍鏊上疏託醫以諫言養身猶置燭閉之室則堅暴之風則淚南方卑濕非聖躬所宜帝大怒曰徐鏊亦附外官耶下詔獄榜三十罰跪午門五日已復廷杖五十謫戍烏撒嘉靖初世宗詔錄忠諫之臣起授本院御醫制詞有抗疏千言瀝血誠而報國投荒萬里甘奇禍以忘身語鏊奏復其姓歷三十七年不調禮部尙書吳山曰是武廟時徐鏊耶何久淹也進院判署南院使事以老自免卒年八十三當嚴嵩父子用事時縉紳多媚之者鏊輒于衆中大言曰君輩不見錢寧在先帝時

事乎聞者錯愕避去鑿侃侃自如也

金洲字士瀛嘉靖五年進士知永康縣考滿入覲以病  
目改國子助教忤張璁意復出知高邑所至清廉無絲  
毫取民者性孝友母病不食亦不食居喪哀毀骨立比  
葬築廬墓側哭踊如初喪弟邁危疾竭力營視不寢者  
兩月其塾師病爲執使令百日無倦容平生邁志爲儒  
者與廣東湛若水浙右蔡宗兗山東王道江西夏尙朴  
遊崑山魏校講學洲師事焉常曰寧無偶不可與匪人  
爲緣又曰居業必自近克己當先難人以爲名言學者  
稱沐齋先生孫大振篤學好修鄉里稱善人

徐學謨字叔明嘉靖二十九年進士爲職方主事仇鸞

新寵受命築城外八堡多以私人冒食學謨董其役悉汰去又扶其用事者驚恨故工畢敘勞削其名賞不及旋改稽勲入直內閣屬以青詞辭不撰內艱服除仍補禮部進郎中出爲荊州知府荆有高雞寨賊數千窟其中縣令中賊餌不以聞乃以事繫令急發兵擊賊且遣辯者諭以禍福一日降三千人而誅其不降者山谷悉平景王封德安以國小多請膏腴地自益荊州沙市亦在請中遣其太監來受地學謨從容言祖制親藩歲祿外不侵民利且沙市荆之以爲府者王安得請之爭甚力又說以受地不如輸租願歲以五百金奉國費王劾奏荊州守抗旨無人臣禮有詔逮問民遮道慟哭御史

持之得末減免歸後沙市卒輸租云隆慶改元起爲南陽知府遷湖廣副使分巡襄陽或承柄臣指誣遼王有異謀學謀獨白王不反被劾罷萬歷初再起湖廣按察使遷副都御史撫鄖陽一意安集鄖人德之入爲刑部侍郎晉禮部尙書時上旣營壽宮千進者數言吉凶冀售其說學謨獨謂車駕頻出費且不貲此曹何所見而紛紛不已因罷之反爲異議者所螫遂乞骸骨歸卒賜祭葬如制學謨初名學詩平生持正守官常依大體惟正禮部時有曹郎與之同名先以劾嚴嵩被譴乃改名學謨以避其嫌時論少之子兆曦字孺旭兆稷字孺穀俱國子生以詩文名孫元嘏字爾常諸生以祖廕入監

正素方集少元 卷三  
爲太常寺典簿累遷刑部郎中天啟間魏闕用事銀鐙  
塞路元報於善類多所保全崇禎初禁獄逸囚左都御  
史易應昌擬刑部尙書喬允升罪未稱旨懷宗怒甚將  
并坐應昌大辟命刑曹勘擬元報引官司故出人罪律  
帝以所擬未當再駁下引律如前謂從辟者聖怒也從  
戍者國法也遂革職杖五十放歸董其昌書世忠堂以  
顏其居

李先芳字茂實父汝節字道亨嘉靖四十四年進士知  
安吉州嘗築石堤三十里以捍水患理冤獄失鄉貴人  
意稍遷順德府同知入爲刑部員外郎左遷饒州通判  
改登州同知招海島所聚逃卒歸伍事聞賜金後告歸



先芳萬歷十七年進士初官中書擢給事中神宗嘗誚讓冢宰先芳疏言待大臣當以禮有武臣謀柄錦衣又言其家貴盛勲戚莫比宜折其萌芽常州人輓輪至京米未入倉嚴旨譴責又言小民道途勞困直以官吏需索過當不滿其意故被重劾願上裁之皆不報而在廷以爲知大體緬甸在西南夷中未嘗侵叛會與三宣構怨小相攻殺而倖功者自謂緬甸不足平遂用二十萬衆討之勞費數歲雲南騷然先芳言蜀之播滇之緬皆不足勤王師乞敕邊臣無費兵餉以事無用遷四川叅議未半載卒先芳留心於經世之學通達國體未竟其用子繩之別有傳

侯堯封字欽之練子寧之後

見名宦

隆慶五年進士由刑

部主事改監察御史清軍江西胥吏不得以勾攝爲奸利繼按福建劾受財鬻獄者乃權貴私人也左遷湖廣僉事備兵蘄黃蘄盜出沒江中防江兵素怯不敢睨盜堯封至則置樓船嚴斥堠扼要害而搗其穴盜悉平蘄民阻大同山者藏亡逋賦法不得行衆欲勦之以爲功獨持不可遣能吏往諭之令其子弟受學遂爲良民初堯封登第出張居正門其母道經蘄供億無加等又上書諷其奪情且言吳中行趙用賢不宜受杖尋改備兵襄陽城臨漢水其西面獨庳且壞卽鳩工增築修老龍堤以衛之甫畢而江暴漲平地水高二丈城得不圯以

城外居民偏受水害賑恤尤周水旣退又增城實堤築  
二石梁以通峴山衆以爲迂明年水至益大新版不沒  
者僅尺許城外民由石梁得渡者無算時堯封巳丁母  
憂去民立祠祀之後補大名值大稔勸發粟修築陽平  
堤三百里如其蒞襄陽時遷福建叅政致仕堯封年五  
十七始通籍所至皆以廉稱在福建時嘗署布政使事  
守藏吏白金錢可支用者若干正色拒之及歸蕭然約  
素子孔詔字孟宣以孝友著歲貢生孫震暘字得一縣志  
作起萬歷三十八年進士授行人驅馳閩越荆楚所過  
不擾厨傳天啟初擢吏科給事中時保姆客氏方擅寵  
旣遣出宮熹宗思念至日肝不食遂宣諭復入震暘上

疏曰禮有慈母君命所使教子也魯昭公慈母死欲爲之練冠有司執論乃止夫慈母職兼教養猶恩以義絕况么麼里婦可數昵至尊哉陛下卽爲客氏富貴計亦當裁抑以示保全不宜異數隆恩寵而益之毒且陛下始而遲其出可也出而復入宮闈禁地姦璫羣小睥睨其側內外鈞連借叢煬竈有不忍言者昔王聖寵而煽江京李閏之好趙婕寵而構曹節王甫之變禍貽宗社良可寒心疏上不省會遼事方棘經略熊廷弼巡撫王化貞相牴牾兵部尙書張鶴鳴右化貞議者遂欲移廷弼與化貞畫地任事震暘知其必敗上疏言熊王不宜並用方有旨集議而大兵已破廣寧化貞廷弼相

率入關猶數奉溫旨責以戴罪立功震暘再疏言臣言不幸驗矣爲今日計論法不論情河西未壞以前舉朝所惜者什七在化貞今不能爲化貞惜也河西旣壞以後舉朝所寬者什九在廷弼今亦不能爲廷弼寬也若不論逃臣之律殘疆其奚賴焉已遂劾沈淮私結客魏狀忠賢卽日傳旨謫震暘臨行復上疏論田賦河渠以逐臣不當建議遂落職歸震暘在垣八月章奏凡三十餘上崇禎初召復故官已前卒因子峒曾請得贈太常少卿峒曾字豫瞻天啟五年成進士授南京武選司主事與徐石麒陳洪謐時號三清丁父憂崇禎七年由稽勲郎中遷江西提學叅議陳學政便宜十事銳意整飭

歲試黜益府兩宗生王怒使人誚讓峒曾抗言學臣祇奉朝廷令甲餘非所知也遷廣東副使不赴起浙江右叅政分守嘉湖漕卒擊傷秀水知縣李向中峒曾請於撫按捕戮首惡部內肅然召爲順天府丞未赴而京師陷福王時用爲左通政辭不就 國朝順治二年六月大兵徇地至嘉定峒曾偕里人黃淳耀張錫眉龔用圓馬元調夏雲蛟等率士民誓死守城乞援于吳淞總兵吳志葵志葵遣遊擊蔡祥以七百人來赴一戰失利束甲遁七月四日大雨加注列陣者不成列城遂破峒曾拜辭家廟挈二子元演元潔並沈於家之葉池 國朝追謚忠節二子入忠義祠峒曾性孝仕宦十餘年屢以

母老乞歸爲人清剛絕俗獨喜引掖後進以文章道義  
相切劘明季復漕令下賴其力得寢元演字幾道元潔  
字雲俱皆諸生幼子澣年十一補諸生後亡命死弟岐  
曾字雍瞻年十一與兄峒曾岷曾同補諸生及長博覽  
工文重氣節敦行誼吳門婁東雲間壇坫角立岐曾相  
與振興古學獎掖後進主文章名教之柄者三十年順  
治三年以匿故人陳子龍逮問巡撫土國寶陰使人遺  
酒脯曰汝湖海無名待家信通得不死岐曾曰我已無  
家何信爲遂受刑岐曾子沆洵與峒曾子演潔澣羣  
從自爲廩和有上谷大龍之譽沆字記原崇禎十五年  
順天副榜明亡不復應舉洵早卒沆初名泐字研德少

補諸生博習經史落紙輒萬言從弟澣亡命有司捕之  
涵挺身代繫久之事解寄跡吳市一時名士推主文社  
少與羣從並受經黃淳耀而涵尤爲淳耀所引重洵子  
榮字武功工詩文早卒有侯伯子集

張恆字伯常由江橋徙居南城萬歷八年進士知茶陵  
興國二州入爲刑部員外郎恆刑浙江多雪冤獄吏部  
尙書陸某以重囚屬免卒按如律晉郎中出爲建昌知  
府爲政務清簡片言折獄建昌人稱爲張半升言候鞠  
者不煩攜宿春也盱江故有橋稅中璫議加額恆白巡  
撫夏良心以太守例入羨金五百兩歸之公帑稅得不  
加秩滿遷按察司副使分巡南昌閣臣家與民爭湖利



兩臺檄議毅然曰相國何藉此決歸民晉布政使叅議以母老乞終養歸

殷都字無美一字開美工詞賦有盛名於時萬歷十一年進士年六十矣知夷陵州州當楚蜀孔道羣山造天徑纔容足行者魄悸乃鑿山開道九千丈遂成坦途蜀鹽例不得入楚販者常以風雨夜操小艇出峽稍不戒人船俱沒都謂步擔易米律所不禁皆縱舍之遂無冒險者課最擢兵部職方員外遷郎中時火落赤起隳西陲借墦力克爲聲勢都爲二寇不相爲用不當急之使合與羣議左而執政深以爲然果次第解去邊夷會獵黃鵝口謀報寇至尙書石星請發兵乘城都曰獵也不

宜輕動以損觀聽已而果獵星內慚諷言官劾之左遷  
歸貧甚餽粥至不給卒於家 國朝康熙時祀鄉賢祠  
嚴貞度原名佩環字茂肅居十一都獨學無師而所爲  
文自出倫輩成萬歷十一年進士知東陽縣旋擢刑部  
以員外郎恆刑浙江晉職方郎中會遼東總兵馬林爲  
太監高淮誣劾謫戍貞度以非其罪與同官力持之神  
宗怒以爲阻撓礦稅斥爲民初度受知大學士沈一貫  
在部曹時朝士欲因以先容而曹務之暇輒逃於酒衆  
以湛飲去之不知其中之落莫也歸而賃屋以居貧不  
能自給沒無以斂天啟元年贈尙寶司丞賜祭葬  
時偕行字汝健萬歷十一年進士歷宰確山長興諸暨

定海所至有能聲擢御史時饑僅半天下倭警日聞偕行條陳八事曰收人心廣儲蓄清軍伍覈募兵選民壯勤訓練嚴軍令儲將材疏糾尙書石星經略宋應昌顧養謙將軍李如松等誤聽朋奸媚倭辱國會雷擊西華門復請時起居以和聖躬納忠諫以和百官明職掌以和兆民散財賄以和邊境皆根本至計一下稱名御史既而巡按山西嚴譴罷歸蓋追論巡城時事爲言官吳文梓等誣劾也家食二十年卒天啟改元卹贈光祿寺少卿

歸子顧字春陽一字貞復有光之族子父有陞以孝聞精律歷醫卜之學子顧萬歷二十六年進士繇中書舍

人遷工科給事中會正陽門樓災上疏切諫曰今天下  
事之最大而急者無如青宮講學而最可虞者無如章  
奏不下青宮輟講六年中外皇皇輔臣請之不得禮臣  
請之不得南北臺省諸臣請之亦不得及闍寺出一言  
利之疏則朝上夕報是不且輕國本而重傷天下之心  
乎章奏一切寢閣則是非邪正不復有所別白進退予  
奪不復有所剴裁安危緩急不復有所倚仗遂使政體  
鬱於上仕路鬱於下財鬱於帑囚鬱於獄此四鬱者非  
所以滅凶而召和也洪範曰肅時雨若蒙恆風若漢書  
五行志曰王者嚮明而治則火得其性而不爲災火爲  
鬱攸之神今鬱結成習遠於肅而近於蒙故旱魃未除

炎火繼作陛下何不仰體天心一日盡舉實政首令皇太子出閣講學亟發一切章奏以消去天下之鬱如此則何禱不應何災不禳豈不鞏宗社無疆之福哉時神宗春秋高福王未之國小人睥睨兩宮間廷臣爭立門戶四方仍歲水旱國力漸屈子顧連上章請飭紀綱以覈實效釋門戶以破嫌疑召致舊臣趙南星鄒元標等以定國論速完福藩府第趣遣之國以一羣心蠲賑災傷之民以培根本節水衡浮費絕方士冒請以足國用又曰臣嘗言天下亂形已成陛下豈以臣言爲未必驗而不信耶言惟無驗驗則不可爲矣榮夷斂怨之言驗而周轍不復西黨銅瞻烏之言驗而漢燼不復然范陽

之覺旣作而歎九齡之先見則已晚靖康之難旣發而緡陳瓘之抗疏則無及人臣甚無樂乎言之一驗而居先見之明人主亦何苦峻卻過計之言而掇必驗之禍哉疏入不報然神宗素知之嘗題歸佛子三字於御屏蓋京師以子顧恬澹寡慾呼爲佛子語徹禁中故也在諫垣九年始陞尙寶司卿繼遷太僕寺少卿熹宗立遷南太常寺卿旋轉南通政司使時璫禍已成遂以病乞歸詔加刑部侍郎致仕踰年卒賜祭葬性孝母病目失明跪而舐之百餘日夢人語之曰爾母九日復明至期果驗在朝嘗薦一外吏吏藏千金於白粲中以進子顧得金大恚遂與之絕及歸無屋以居光祿須之彥以數

椽居之客至麥飯葱汁坐論文史充如也所著詩文及  
編葺詳藝文類

須之彥字君美居廣福父諱字惟厚居鄉多長者行沒  
祀鄉賢之彥萬歷二十六年進士歷淳安浦江桐鄉令  
多善政遷京衛府學教授國子博士擢都水主事權關  
荊州改儀制司陞員外署郎中時神宗倦勤皇太子久  
輟講皇長孫年十六尙稽冊立之彥累疏請并條議藩  
例忝劾豪宗光宗立以遺命欲尊鄭貴妃爲皇后侍郎  
孫如游袖中出令旨之彥持不可立索筆草疏疏上得  
寢遷光祿丞尋陞尙寶司少卿魏忠賢擅政削籍爲民  
崇禎初詔復原官致仕

孫元化字初陽舉萬歷四十年順天鄉試好奇略師事上海徐光啟受西學製軍中火器尤精天啟初上書當局條備京防邊二策侯震陽薦其才從軍遼左以策干王在晉在晉不能用及孫承宗代在晉奏授兵部司務旋陞職方主事贊畫袁崇煥軍務事竣還朝魏忠賢諷其附己當大用元化正色拒之遂矯旨奪職崇禎初起武選員外郎進職方郎中崇煥已爲經略乞元化自輔遂改山東右叅議整飭寧前兵備道時燕薊東西被兵連告警元化善用關西將卒所向有功所隸八城二十四堡四百里之地屹不動會皮島副將劉興治作亂廷議設登萊巡撫遂擢元化右僉都御史任之駐登州明



年島衆殺興治元化奏以副將黃龍代之汰其兵六千人四年孔有德反有德者遼人與耿仲明李九成毛承祿輩皆毛文龍帳下卒文龍死走入登州元化錄之下且多收遼人爲牙兵是年大凌河新城被圍部檄元化發卒往援師抵吳橋縣令閉門罷市衆無所得食一卒與諸生角有德扶之衆大譁而九成先齎元化銀市馬塞上用盡無以償適至吳橋遂劫有德爲亂攻陷郡縣十餘山東巡撫余大成江寧人不知兵聞變卽託疾不出遣中軍沈廷諭叅將陶廷鑑往禦則皆敗而走大成恐遂定議撫而元化亦主撫師次黃山館而返賊遂抵登州中軍耿仲明都司陳光福等導賊入東門城遂

陷元化率從官巷戰總兵張可大以下死者十九人元化自刎不殊亂兵見之莫敢犯者有德趣元化移書求撫於大成而陰縱元化還事聞逮元化下獄首輔溫體仁論大辟臨刑西市黃霾翳日風雷驟起光啟謂體仁曰此足明登撫真冤矣子和鼎和斗和京元化在詔獄和京侍及死時頭血濺地和京伏而舐之盡觀者莫不流涕乙酉嘉定城下與妻高氏同死之和鼎和斗皆謝諸生服埋名著書以終

張振德字季脩情之孫由崑山籍拔貢除四川興文知縣興文故九溪蠻地萬厯初始建土牆數尺戶不滿千距蘭賊奢崇明巢穴僅百餘里時崇明有異志陰結奸

人掠買漢丁振德請之兩臺復弓手舊額嚴出入之禁  
招還被掠者三百餘人崇明賄以二千金振德怒却之  
裂其牘天啟元年八月振德兼署長寧被檄入鄉闈而  
崇明所遣援遂將樊龍等殺巡撫徐可求副使駱日升  
李繼周等重慶知府章文炳巴縣知縣段高選皆抗節  
死賊遂據重慶九月振德甫出闔長寧主簿徐大禮知  
興文不可守以騎來迎振德不可曰興文吾職也敢避  
難乎疾驅入城檢篋中得銀一兩付幼子緄曰我不及  
見汝冠矣命之去未幾賊衆薄城振德手劍跨馬迎戰  
不敵退集居民固守會天大風雨土城摧裂賊擁入振  
德率家人顧美嚴興巷戰皆死亟馳入署積薪後堂左

握兩印右秉七首命舉火火熾自刎妻錢氏女淑昭淑  
慶伏劍先死從死者僕一人婢二人明日賊首于烟燄  
中見振德尸手兩印堅不可取猶忿怒如赴敵狀皆駭  
愕稱忠臣羅拜而去大禮聞振德死曰張公有以教我  
矣亦飲藥死事聞特贈光祿寺卿謚烈愍子祭葬立祠  
廕長子紀錦衣正千戶世襲

龔用圖字智淵宏四世從孫父欽仕見孝義傳用圖中  
天啟元年舉人崇禎末爲秀水教諭見時事孔棘棄官  
懷印歸其家人已避居石岡邨舍會侯峒曾黃淳耀謀  
城守遂慨然訣妻子協守南門衣不解帶者匝月聞東  
門破左右勸啟關出弗聽與兄用廣相抱赴水死用廣

幼子元韶甫十歲從之後家人覓屍不獲見柳樹下水中二屍相抱其一肘間有秀水教諭印始知之用圓後入祀忠義祠用廣字儉化諸生方嚴有志操兄弟自相師友季弟用厚字恕先亦諸生與妻沈氏子元明元桂及用圓子元彬用廣妻婁氏俱自沈於石岡之池水用廣長子元昉字得初亦諸生掖母起水中以身熨之寒傷骨遂患脇痛竟以此亡

國朝

陸元輔字翼王先世本王姓父昌期以掾起家署太平府司獄申明冤濫調番禺沙灣巡檢初至獲渠盜上官輒以賄縱昌期乃以藥縛投海中盜少息番禺祀之名

宦元輔爲黃淳耀門人直言社中小有指摘必痛悔流涕淳耀稱其學行後棄諸生博覽載籍研精經學康熙十七年以博學宏詞徵至都夢見淳耀及試遂以不入格罷歸晚年病王圻續文獻通攷藝文一門多所錯漏乃作續經籍攷以正之窮年抄撮積至數十冊未及刪定而沒然採掇元明遺籍索隱抉微不少故朱彝尊撰經義攷多取其說子宗濂字維水復姓王詩文一軌于法古貌古心有固窮之操歿年八十

趙俞字文饒中行五世孫父萼字九英爲名諸生俞中康熙二十七年進士邑有大獄詞連俞遂以褫職同年知其寃出鍰贖之因復進士謁選得山東定陶縣蒞任

見涇潦滿野集父老問之曰邑所苦在此俞度其境內縱橫爲三渠以通大川如古溝洫畛塗之制蓄泄兼資車輿可通規畫定令民自浚其界旁之渠而旁近者皆協理焉時單騎巡視恐其塗之易圯也築令平實樹以桑棗雜以榆柳俾落實取材交有所資又以三渠不能徧通四境且車馬蹂躪或陷于淖則橫鶩別驅爲害黍豆明年擇其要處又規爲六路其廣倍三渠之堤而傍路有溝殺于渠者三之二俾宛轉以達于渠其築樹之法一如渠堤然後雨潦之集悉達于河連歲大熟周城壕令民栽蓮以取利立法輸糧不施鞭扑吏役無事公庭寂然平時課士最勤親爲講解指畫餘閒或挈之

以遊士莫不鼓舞共勸于學修學宮從祀位次考之闕里志自爲文以記之在任五載辭疾歸抵家後發舊所藏書讀之結淡成社與同志從容觴咏卒年七十有八孫丕烈見文學傳

張雲章字漢瞻居嘉定之橫港荒江蓬戶有樸三株亭亭入雲因自號樸村父履素好史記及韓柳歐蘇文命日誦一篇口爲講解稍長遂能文肄業國子監王士正爲祭酒首獎其古文詞汪琬亦云浩浩瀚瀚氣如江海之流久之崑山徐乾學及興化李枏俱延至其家校勘書籍旣而歸移居城南讀書談道悠然自得也張伯行巡撫江蘇陳鵬年爲蘇州知府咸器重之吏部侍郎湯



右曾以孝廉方正薦于朝徵入都與修尚書彙纂書成  
議敘縣令不謁選將南行伯行請主潞河書院居二年  
辭歸年七十九卒幼子揆方亦以文名

張鵬翀字天飛雍正五年進士授庶吉士改檢討充

皇清文穎館纂修十三年充雲南副主考乾隆元年冬  
充八旗誌書館纂修六年陞翰林院侍講七月充河南  
正主考九月陞右庶子十月充日講起居注官七年  
擢少詹事九年晉詹事鵬翀才敏捷又手擊鉢頃刻便  
成有敕和詩先成以進者必鵬翀故

上愛其才不次拔擢侍講日進史法戒詩五十章寓規  
於頌

上嘉納焉又陳十幀箴稱

旨兼工于畫嘗自繪春

林澹靄圖題絕句六首進呈

上和其韻以

賜鵬翀卽於宮門前疊韻謝

恩

上益賞之嗣後屢

敕和詩

命作畫

賜御

詩書畫暨書籍硯筆紗緞絨貂之類無算每

召見

溫語移時諮詢纖悉如家人父子十年乞假省墓抵德  
州病卒

上聞驚悼久而不忘對羣臣輒曰張鵬翀可惜云性好  
山水所至必以五七字寫之故詩編最富有南華山房  
集三十卷

王鳴盛字鳳喈父爾達見文學傳鳴盛弱冠補諸生屢

試第一乾隆十二年以五經鄉試中式十九年成進士  
廷試第二人授編修二十一年大考翰林第一特擢侍  
讀學士三十四年充福建鄉試正考官尋陞內閣學士  
兼禮部侍郎事竣還京以濫用驛馬被吏議左遷光祿  
寺卿尋丁內艱歸遂不復出久之遷居蘇州學者望風  
膺至鳴盛故與長洲吳泰來青浦王昶上海趙文哲張  
熙純及其妹夫錢大昕以博學工詩文稱繼又有江左  
十二子苔岑集之刻聲氣益廣而鍵戶讀書絕不與當  
事爵接家本寒素往往賣文諛墓以給用偃仰自得者  
垂三十年以嘉慶二年十二月歿於蘇州鳴盛爲詩大  
抵以才輔學以韻達情聲依永律和聲粹然正始之音

也古文不專一家擷經義之精奧而以委折疏達出之  
先與元和惠棟吳江沈彤研經學一以漢人爲師鄭元  
許慎尤所墨守所著尙書後案軍賦考精深博洽又著  
十七史商榷於一史中紀志表傳互相稽考因而得其  
異同復取稗史叢說以証其舛誤前人糾繆拾遺之作  
不屑撫摭也晚年作蛾術編有說錄說字說地說物說  
制說集說刻說通說系十門共一百卷亦以淵源稱於  
世

曹仁虎字來殷年十六爲縣學生學政崔紀有奇才之  
目巡撫雅爾哈善聞之選入紫陽書院院長御史王峻  
尙書沈德潛先後稱其才而學政夢麟尤激賞其詩雷

銓以優生薦舉乾隆二十二年

南巡獻賦

召

試列一等賜舉人授內閣中書二十六年成進士授翰林院庶吉士散館改編修擢右中允充日講起居注

官扈

蹕盤山奉

敕廣和尋遷侍講轉侍讀進

右庶子擢侍講學士五十一年視學廣東與少詹事不  
恕接任恕諸生時嘗受業於門粵人傳爲佳話明年母  
程恭人終於官署時方按試連州聞訃冒暑奔喪卒於  
途年五十有七生平以文字受主知京察常列一

等兩遇大考皆列二等教習庶吉士者七典山西鄉試  
者一分校順天鄉試者一分校會試總裁武會試者各  
一仁虎以聲華名望爲都下所推然端靜自守恂恂粥

五言古詩卷之二十一  
五  
粥其詩初宗四傑風華縟麗壯而浸淫於杜韓蘇陸下  
逮元好問高啟何景明及本朝王士正朱彝尊諸人  
七律尤高華工整獨出冠時所著詳藝文類

寶山縣

國朝

李錫秦字瞻仲父實見文學傳錫秦雍正二年舉人以  
與修圖書集成書成議敘授廣西羅城知縣羅城萬山  
環繞苗獍雜處劇盜潘志亮等負嵎劫掠爲民害錫秦  
飭健役入崗先擒志亮而寬其脅從者遂請設汛兵編  
保甲爲善後計督撫交薦擢全州知州又授直隸鬱林  
州州多荒土設勸懇之法熟田三萬六千餘畝境有藤

釐坡無溪澗錫秦親往量度得石穴開之泉水甘冽足資灌溉土人于是建瑞泉祠 御書惠潤田功額以

賜焉旋擢太平府知府府屬寧明州土民聚衆祈雨汛兵止之抗不從遂以叛聞提督總兵議興兵進勦檄委錫秦贊軍務錫秦力阻之馳往察其抗者予杖餘寨賴以無恙乾隆四年擢右江道時慶遠府屬白土邱索二村土蠻覃奉恩藍明反等勾結各村同叛而義寧逆苗吳金銀亦跳梁總督調漢土兵三千名以屬錫秦分兵五路與副將由中路進路險峻乘夜攀崖抵邱索各路亦如期齊集焚其巢賊棄寨奔督兵追之擒殺甚衆遂攻白土先破其左右柵門自寅至午戰益急賊不支奔

入後山追剿于懸崖峭壁間擒明反奉恩等磔之七日  
內兩寨悉平捷聞奉 旨議敘列功第一旋監義寧

軍剿吳金銀猝遇賊數千卽與副將奮擊之賊走翼日  
復分兵邀截賊衆乘勝燬平霸夾江諸巢自朝至暮追  
殺十五里生擒金銀之姪吳老四等次日復燒燬石灰  
窰巢穴圍里昌背麻龍野舍等五寨遂屯平鄧其地連  
湖南傳素古孟諸寨而中隔盤胖諸猥賊張疑兵于前  
山陰由間道以襲我營錫泰已分兵搗盤胖賊大驚敗  
走餘賊入楚疆乃會期夾剿楚兵攻傳素粵兵攻古孟  
大破之吳金銀走都敖錫泰計獨車小江諸寨策應先  
設伏以待兩逆黨遇伏大敗進剿至藍山生擒僞將軍



偽國公等追獲吳金銀于象州于是庖田廣南龍平故  
崗蒙崗平定硬州地林牛寮等苗皆股慄乞降諸寨悉  
平明年三月餘黨石金元又勾結黔苗傷兵拒捕總督  
復調兵四千與黔省會剿俾其督理軍務時錫秦在桑  
江辦善後事宜聞 命馳往懷遠就近調度首惡就

擒又遷江縣李彩以它害聚衆與風口邨羅天與等數  
千人攻劫復由懷遠赴遷江破風口村天與等擒獲事

竣奉

旨署廣西按察使粵西頻年用兵皆由奸人

造符書因而滋事錫秦訪緝奸宄張方韋權茂等究擬  
如法且以邪說爲地方之害所犯軍流未便照苗人例  
枷責完結 奏請發遣別省以杜煽惑于律例中就苗

人易犯者摘二十餘條句疏字解刊成書發各州縣朔望宣讀以教訓之苗獠始知奉法十年五月署廣西布政使以太平鎮安二府山多田少歲收歉卽須撥濟

奏請于積貯多處撥米八萬石分貯二府屬卽將糴價解交向價平處買貯以備緩急粵西常虞乾旱仿照江南龍骨水車繪圖製造先自桂林次檄外府民便于耕而食自足又以苗獠愚蠢皆由內地漢奸及兵役擅入詐擾而南寧太平鎮安三府沿邊二千餘里逼近安南乃酌議封禁關隘惟許商旅出入邊境肅然十七年

特授廣西巡撫謝 恩摺略云廣西偏近安南苗獠雜處靖邊之道惟在嚴內地之法令而明示外蕃以易

從治苗之道惟使安無事之耕耘而不強以素性所不  
慣又言分設佐貳原佐州縣所不及一官應收一官之  
用而通屬巡檢向不駐劄本地者一十六處大非設官  
本意 奏動帑各爲建署又廣西巡檢六十四缺所設  
弓兵有無多寡不一就其繁簡妥爲分派庶免偏枯以  
收巡查實效又議將土州縣內有未設流官者相度形  
勢斟酌繁簡改歸流官兼管自此各土司均收控制之  
益留心水利設法興舉修南寧府之護城石堤挑義寧  
縣之老河開宜山縣之田畝撫粵二年庶政畢舉竟積  
勞以卒

秦倬字天采乾隆十三年進士選雲南江川知縣留心

民事抵任後陳于上司云水利民生最關緊要縣轄如  
西山海西二鄉及上下雙龍普妙等鄉地勢低窪時慮  
河堤衝決應令農民隨時修堵以備蓄洩近城田畝惟  
賴東西二河緣河高田低易於冲歷前經設立壩頭巡  
查於農隙時督夫修堤加厚培固再江邑有星雲湖周  
圍八十餘里匯縣屬諸水入河湯縣之撫仙湖至縣屬  
榮富西山海西古城等鄉皆有小泉用則引水入田不  
用則放入星雲湖每逢栽插之時誠恐農民彼此爭水  
飭委典史逐鄉巡查督令上滿下流務使均勻灌溉夏  
秋霖雨過多山水冲發恐有泥沙淤塞督率民夫隨時  
疏濬又保甲議云保正之法在在可行要惟因其土俗

庶幾簡便易從是以諭令鄉保將各村人戶男婦丁口  
作何生業并同居親屬僱工姓名按照門冊詳細開報  
每戶各給門牌一面卽照開報人數填載十戶編爲一  
甲另給一牌其甲長按月輪當平時則稽查出入失事  
則分別懲勸甲內之寡婦廢疾免充甲長畸零人戶附  
於甲末勿許通同容隱仍於因公下鄉之便留心訪察  
務期奸匪難容地方寧謐門牌所需紙張在官捐辦以  
省擾累又示士子云讀書之法經爲主史副之學庸論  
孟此童而習之者外此則先之以五經其次如左傳之  
淹博公穀之精微儀禮之謹嚴周禮之廣大爾雅之辨  
晰毫芒大至無外而細入無間此十三經者闕其一卽

如手足之不備而不可以成人者也至於史則先史記  
次前漢書次後漢書此三史者亦闕一不可讀本紀可  
以知一代興亡盛衰之由讀年表世家可以知大臣創  
業立功之所自讀列傳可以知人臣邪正公私卽以關  
係國家得失利害之分讀忠孝節義隱逸儒林文學方  
伎等傳可以知各成其德各精其業以各造其極而得  
其或顯當時或傳後世之故讀匈奴大宛南夷西域諸  
傳可以知安內攘外柔遠綏邊恩威各得之用讀天官  
歷律五行諸書志可以觀天而並可以知天人相感之  
原讀河渠地理溝洫郡國諸書志可以察地而並可以  
知險要防守之機讀禮樂郊祀儀衛輿服等書志可以

知典禮掌故之因革而有所叅訂讀藝文經籍等志可  
以知七略九種四部六庫著作之源流而有所考稽讀  
平準食貨諸書志可以知出入取予制節謹度之大要  
而有所規鑒讀刑罰等志可以知懲惡勸善討罪立功  
經權常變之大法而有所折衷此讀史之大要也且善  
讀史者不僅以史視史凡詔誥奏疏檄諭論策之屬文  
之祖也樂章歌辭之屬樂府詩歌之祖也屈原賈誼司  
馬相如楊雄等傳所載騷賦之屬詞賦之祖也故熟於  
三史則文賦騷詩一以貫之矣况不止三史乎此外如  
家語國語國策離騷文選老莊荀列管韓以及漢唐宋  
元之文集與三國志晉書以下諸史叅讀叅看擇其尤

精粹者讀之其餘則分日記看叅錯互讀反求其本必  
出言爲經術之言行事爲經濟之事夫而後可以爲國  
家得人矣此本縣之兢兢爲諸生望者也蓋其篤於教  
如此以不善事上官中計典比去任同官鳩銀爲助乃  
得歸歸六年而卒年七十餘倬嗜讀書有自記統計平  
時所讀一萬三千一百九十三卷內可記憶者約八千  
餘卷著有三餘前後集一百三十卷惜無傳之者

崇明縣

明

彭璟字仲玉邑庠生以工書薦授工科給事中先是元  
季儒學不行黌宮頽廢民間多用鈔歲久糜爛遂起爭



端璟奏免鈔法并修學舍舊制軍多遠調璟奏所在軍士就附近所衛操備有父母無次丁者留本衛奉養遠近感之尋陞浙江布政司叅議凡民間有不便輒奏聞以重名節興教化恤窮困爲務未幾致仕歸祀鄉賢

國朝

宋德宜字右之邑庠生遷居長洲順治十二年進士選庶吉士授編修歷官吏部尙書 文華殿大學士加太子太傅以疾卒于官年六十二諡文恪予祭葬德宜風度端凝學問淵博爲都御史上疏請弛海禁更定鹽法裁省筆帖式禁通販疏黃硝又言捐納授官非經久制請限以月或以年所言次第舉行又上言各處統兵大

將軍王以下玩寇殃民或掠取婦女或擾奪財物請嚴飭禁絕

上是之山東大帥柯永綦縱兵鼓譟德宜疏劾卽命逮訊大軍進黔秦蜀之餉彼此推諉會星變德宜建言併川陝總督爲一人則痛癢相關可以隨地調發 詔從之滇黔粵蜀旣平俘獲婦女籍旗下德宜言婦女何辜宜聽收贖所釋甚衆德宜口納至國家大事自爲一議反覆開導多所報可性孝友年十七以父學洙巡按山東死事狀伏闕上書得贈卹兄德宸字御之弟德宏字疇三早著文譽一時有三宋之目長子駿業累官兵部右侍郎次子大業累遷內閣學士康熙三十二年典江

西鄉試取朱軾第一

黃初緒字繩伯生而穎異七歲作詩魏璫文見者舌咤  
比長通經史旁及百家精奇門遁甲術國初助總兵  
梁化鳳戰守有功化鳳欲表薦初緒不可後以公事謁  
學政石綽里慢慢曰若卽黃某耶聞君名久矣蓋知其  
助戰事也康熙二年舉人六年試禮部第一以忤要人  
置三甲中未用然

上雅知初緒名一日語輔臣曰黃初緒遠學可召任內  
宏文院中書舍人蓋異數也無何以疾卒於京邸

顧藻字懿樸康熙十五年進士入翰林歷官工部左侍  
郎二十一年會試同考官二十九年典試江西旋擢順

天學政其先五世祖師枚隱居長洲之旱涇人比之孤  
山處士父溥贈侍郎有四子藻其次也爲宋德宜婿因  
占籍於崇明天性孝友篤於故舊博學能文聲著史館  
歷任文衡所得皆知名士工楷隸嘗奉

命書

御製林泉碑

昭陵

福陵神功聖德碑卒年五十有六

賜祭葬兄奕榮

康熙二年舉人弟奕芬光祿寺署正奕胤邑廩生其後  
皆還歸蘇州

袁銑字麗珍雍正元年舉人考授內閣中書遷侍讀尋  
擢福建道御史屢上書軫恤民瘼如山左歲荒請借籽

種河工僱役請加工價俱見

允行會以道府薦

特令留臺大學士張廷玉曰內外一體此間殊不可少也十三年分校武闈殿試一甲三人皆其所得士轉掌廣東道兼署河南道巡視中城和平清介羣畏而懷之十四年秋邁疾卒姪學泗有文名省覲北歸卒于水

生員

俞時楚校  
陸錫瑞

直隸太倉州志卷二十八終